


千金寶要



叢書初集編成

主王編雲五者

商務印書館發行

千金寶要

孫思邈集

本館據平津館叢
書本排印初編各
叢書僅有此本

重刻千金寶要序

千金寶要十七卷附論及千金須知爲十八卷宋宣和時郭學士思從孫徵君思邈所撰千金方擇要刻石華州公署自明正統景泰間俱有木石刻本至隆慶六年秦王守中復刊石耀州真人祠四庫書未及收錄余遊關中得其搨本藏笈中按家徵君生於後周卒於唐永淳之代葉夢得避暑錄話稱其作千金前方時已百餘歲後三十年作千金翼段成式酉陽雜俎則謂昆明池龍宮有仙方三千首徵君以救龍得之因上帝不許妄傳復著千金方三十卷每卷入一方千金方本與千金翼方爲二書是以舊唐書本傳止載千金方三十卷晁公武陳振孫書目則云各三十卷今俗本千金翼方九十三卷不知何人更其次第千金前方竟不可別此宣和時擇要本當從前方錄出者龍宮仙方在其內真世閒祕異之書不可不廣其傳以公同志書中謂今俗稱豆瘡爲小兒丹毒又有反花瘡元人奇效良方始謂之痘疹可證俗人謂此疾出於近代者非也縊死人可救落水死人經一宿猶可活倉卒間不知其方書備其術尤爲濟人之仁術世之從政者不師蓋公獄市勿擾之言惟株累鍛鍊之是務置一切積貯水利農田學校利益於人之事於不問以致損傷元氣感召災殃誠不如尋覽方書胸中常有活人之念爲善最樂在此不在彼矣嘉慶十二年七月三日賜進士及第授通奉大夫署山東布政使督糧道加四級陽湖孫星衍撰

千金寶要

於藩署之濟性堂

序

刻千金寶要序

千金寶要者宋徽猷閣直學士郭思按唐孫真人先生所集千金方中纂要者也宣和六年思曾刻石于華州公署我明正統八年華州知州劉整重刻景泰六年和州楊勝賢以石刻冬月不便摹印易刊木板往年春予得之喜其方之簡便藥之近易醫不煩而取效速信有切于人之實用迺珍如拱璧不容自祕已命壽之梓矣竊惟寶要纂自真人千金方中天下之遊耀州真人洞者歲無虛日日無虛時顧獨不立石于真人洞前非所以廣其傳也因刻于洞前云隆慶六年歲在壬申春三月上吉秦王守中識

千金寶要目錄

婦人第一

小兒第二

中毒第三

飲食中毒第四

解百藥毒第五

蛇蝎等毒第六

喉痺金瘡第七

瘡疽癰腫第八

霍亂吐瀉第九

虎犬馬傷第十 針折入肉附

舌耳心目等大小便第十一

中風大風水氣第十二

千金寶要 目錄

二

- 瘧痢癥等第十三
- 頭風吐逆第十四
- 疫瘴濁淋第十五
- 頭面手足瘻瘍瘡漏第十六
- 痔第十七
- 論
- 千金須知

千金寶要卷之一

唐 孫思邈集

婦人第一

妊娠難產燒車軒脂內酒中服亦治腹中痛并欬嗽。

妊娠忽苦心腹痛燒鹽令赤熱三指撮酒服之立產。

又方存槐子二七箇。

又方菟絲子或車前子以酒或米汁服方寸匕卽生。

又方水或酒服家中黑塵。

子死腹中及小難橫生倒生難生者半夏白斂各二兩末之服方寸匕亦可加代赭瞿麥各二兩佳小難

一服橫生二服倒生三服子死四服。

又方榆白皮細切煮三升服之。

子死衣不出上捨心者急取蟻蛭土三升熬之令熱囊盛熨心良。

又方末竈突中墨三指撮水或酒服之。

乳無汁者。土瓜根末之。一服半錢。七日三。

衣不出及橫生逆生者。小麥小豆煮濃汁飲立出。

產三日不出者。燒大刀鑼以酒一盞沃之。頓服。

又方。燒藥杵令赤。內酒中飲之。救死不分晥者。

產乳暈絕者。製了半夏一兩末之。丸如大豆。內鼻孔中。愈。

又方。神麵末水服方寸匕。

又方。舍醣醋噀面。

子死腹中。牛屎塗母腹上。立出。

胎死腹中。服水銀三兩立出。

未足月而胎死者。以苦酒濃煮大豆。一服一升。死胎立出。

妊娠時疾。子不下。竈中黃土水或酒或泔清調塗臍方寸。乾再上。

又方。酒服車轆脂。

又方。蓼白一把。水三升。煮熟食蓼令盡。亦安胎。胎死者即出。

妊娠中疊燒敗皺皮。酒服方寸匕。

妊娠傷寒. 菟白十. 蒸生薑二兩. 切水三升. 蒸去半. 服取汗.

產後血不盡. 煩悶. 捣生薑取汁飲二升. 良.

產後腹脹痛者. 蒸黍粘根爲飲. 一服卽愈.

五色帶下者. 蒸瓠帶汁. 服一盃. 良.

月水不斷. 灸內踝下. 白肉際. 青脉上. 隨年壯.

又方. 服地黃酒. 良. 或大豆服亦佳.

月水不利. 及無子. 灸四滿三十壯. 穴在丹田兩邊. 相去各一寸半. 丹田在臍下二寸.
漏下. 積年困篤者. 取鵠重巢燒灰. 末之. 服方寸匕. 日三服. 三十日愈. 重巢者. 連二年鵠產其上者是.
產後月水往來多少不定. 或不通. 痛. 小腹急. 腰身重. 白馬尿一升服之. 良.
逆生橫生者. 瓢下黃土三指撮酒服立出.

小兒第二

凡小兒生下不啼者. 取兒臍帶向身. 卻捋之. 仍呵之百度. 亦可以菟白鞭之.

浴新生兒. 以豬膽一箇. 汁入湯中. 令兒無瘡疥.

小兒生輒死者. 便覲兒口中懸癰. 前上腭有胞者. 急以指摘取頭. 決令潰去血. 勿令血入咽. 入咽卽殺兒.

慎之。

小兒臍不合燒蜂房灰末傅之。

小兒中風口噤雀屎如麻子丸之飲下卽愈。

兒生三日內朱蜜多則生陰癧朱蜜三日內通得用三豆許朱蜜後與牛黃亦三豆許除兒百病牛黃後可與米飲研米作厚飲如豆大與兒三豆許止日二七日後方哺乳。

小兒解顱熬蛇脫皮末之和猪頰車中髓傅頂上日三四

小兒肚皮卒然青黑以酒和胡粉傅上若不急治須臾便死。

又方灸臍左右上下各半寸並鳩尾骨下一寸凡五處各三壯。

小兒暴脈欲死半夏隨多少微炮之爲末酒丸如粟米大日三

小兒丹毒搗慎火草絞取汁塗之。

小兒赤遊腫若偏身入心腹殺人搗伏龍肝爲末以雞子白和傅之乾易之。

又方白豆末水和傅之勿令乾。

又身赤腫起者熬米粉令黑以唾和傅之。

小兒傷寒發黃搗土瓜根汁三合服之。

又方.搗青麥汁服之。

又方.搗韭根汁.澄清.滴兒鼻中.如大豆許.卽出黃水.差。

小兒崔亂研尿滓.乳上服之。

又方.牛涎灌口中一合。

小兒客忤.吞麝香大豆許.立愈。

又方.以母月衣覆兒上.大良。

又方.取牛鼻津服之。

又方.取牛口沫傅乳頭飲之。

又方.取熱馬屎一丸.絞取汁.飲兒下便愈.亦治嘔吐面青腹強者。

小兒誤吞針.取磁石如棗核大.吞之.或舍之.其針立出。

誤吞鐵物等.艾蒿一把.剉以水五升.煮取一升半.服之.卽下。

誤吞髮.亂髮燒灰酒服.一錢。

吞錢.艾蒿五兩.以水五升.煮取一升.頓服之.卽下。

又方.末火炭酒服方寸匕.水服亦得。

又方.服蜜二升.卽出.

吞金銀釵鑲.白糖二斤.一頓漸漸食之.多食益佳.

又方.吞水銀一兩.再服之.

吞鑲及指彊燒鴈毛二七箇.末服.鴈毛亦得.

吞釵.暴韭令萎.蒸熟.勿切.食一束.卽出.或生麥葉筋縷.如韭法.皆可用.但力意多食自消.

吞銅鐵而哽.燒銅弩牙令赤.內酒中飲之.立愈.

吞釘針及箭簇等.但多食脂肥肉令飽.自裏出.

吞針.取懸針磁石末.飲.服方寸匕.卽下.

小兒尿竈丹.初起.兩股八臍陰頭皆赤者.水二升.桑皮切二升.煮取汁.浴之.良.

又方.燒李根爲灰.以田中流水和傅之.良.

小兒朱田火丹.一日夜卽成瘡.先從背漸偏身.如棗大赤者.濃煮棘根洗之.已成瘡者.赤小豆末傅之.

小兒茱萸丹.初起.背偏身如纈.一宿成瘡者.煮赤小豆作末.以傅之.

小兒麩竈火丹.初起.足趺正赤色者.以棗根煮汁.沐浴五六度.自愈.

小兒風瘡隱疹心迷悶巴豆二兩以水七升取煮三升故帛染汁拭之大人加減用之

又方礬石二兩末之酒三升清令消帛染拭病上

又方吳茱萸一升酒五斤煮取一升半帛拭病上

小兒隱疹入腹體強舌乾蕪菁子末酒服方寸匕日三

又方蠶沙二升水二升煮去渣洗之

又方鹽湯洗了以蓼子搗傅之

又方車前子作末傅之

諸丹毒渠中藻菜細切熟搗傅丹上厚三分乾易之

又方芸薹菜熟搗厚封之隨手卽消如餘熱氣未愈但三日內封之使醒醒好差止

五色油丹縛母猪枕頭臥之良

又方牛屎塗之乾則易之

赤流腫搗火麻子水和傅之

又方以羊脂煎了磨之赤黑丹起偏身者殺人

小兒瘡初起熛漿似火瘡熟搗桃仁以麪脂和傅之亦治偏身赤腫

小兒身體頭面生瘡，榆白皮隨多少，暴令乾末之，醋和塗縣以傅，瘡上蟲自出。
小兒丹毒，馬齒莧一握，搗取汁飲之，以滓傅之。

又方，搗赤小豆五合水和，取汁飲之一合，良。滓塗五心。

又方，濃煮大豆汁塗之，良。差亦無瘢痕。

又方，臘月豬脂和釜下土傅之，乾則易之。

小兒五色丹，搗蒴蘆葉傅之。

又方，薤白一把，豉一升，以水三升，煮取二升，分三服。

又方，柏葉一升，麻子末一升，以水五升，煮三沸，百日兒每服三合。

又方，搗石榴汁服之。

又方，亂髮灰、鹿角灰等分，三歲兒以水和服三錢七日二。

小兒赤白痢，單服生地黃汁一合。

小兒熱痢，煮木瓜葉飲之。

小兒冷痢，蓼菜搗汁，量大小飲之，一作芥菜。

又方，搗蒜傅兩足下。

小兒暴痢。赤小豆末酒和塗足下。日三油和亦得。

小兒蠱毒痢。藍青汁一升二合分爲四服飲之。

小兒渴痢。搗木瓜汁飲之。

小兒頭不生髮。楸葉搗汁傅之。

小兒瘻瘡。冢中石灰厚傅之。

小兒浸淫瘡。以竈下黃土、髮灰等分末之。以豬脂和傅之。

小兒疥瘡。以臭酥和胡粉傅之。

小兒濕癬。煎馬尿洗。

小兒斑瘡入眼。浮萍陰乾爲末。以生羊子肝半箇入盞內。以杖子刺碎。浸水半合。絞取肝汁。食後調下。不甚者一服已。傷目者十服見效。大人亦可用。

小兒赤熱腫目。川大黃白礬朴硝等分爲末。冷水調作掩子貼目上。

小兒重舌。腫起舌下。以朴硝研水敷咽喉外。其內用成塊者含涎出乃平。

又方。地蟬蟲和薄荷研汁帛包。蘸舌下腫起重舌。

極證。用指去爪。先于舌下筋上擦至根。漸深深擦。如此三次。又用指蘸水。取項後燕窩小坑中筋。自上趕

下至小窟深深擦入三次。小兒若飲乳勝前，則病去矣。

小兒禿瘡及惡瘡，以苦練皮燒灰，以猪脂調傅。大人惡瘡亦可用。

小兒卵腫偏墜，防風牡丹皮等分爲末，每服二錢匕，溫酒調服。鹽湯亦可。

小兒卒客忤，以竈中黃土，蚯蚓糞等分研細，水調塗兒頭上及五心。良。

又方米粉鹽等分炒變色，腹上摩之。

小兒頭瘡，經年不差者，取屋塵末和油瓶下淬，以皂角湯洗傅之。

小兒頭瘡，胡粉一兩黃連二兩末之，洗瘡去痂，拭乾傅之，即差。再發再傅之。
禿瘡，草廬子細末先洗傅之。

小兒惡瘡，熬豉令黃末之，傅瘡上，不過三傅，愈。

小兒手足及身腫者，以小便溫煖漬之，即愈。

又方巴豆五十枚去心皮，以水二升煮取一升，以絲內湯中，拭病上，隨手消，并治隱疹。

小兒脫肛，灸頂上旋毛中三壯，即入。

又方灸尾翠骨三壯。

又方灸臍中，隨年壯。

小兒疳瘡嚼麻子傅之日六七度。

小兒濕瘡濃煮地榆汁洗浴日兩度。

小兒尿血燒鵲巢灰井花水服之亦可治尿牀。

小兒解顱猪牙頰車髓傅顱上差。

小兒風瘡隱疹牛膝末酒服方寸匕漏瘡多年不差搗末傅之亦治骨疽頑疾瘰癧絕妙。

小兒胎寒喚啼驚癇腹脹不嗜食大便青黃并大人虛冷或有實不可吐下者馬齒礬一斤燒半日以蜜膏和大人服如梧子二丸日三小兒以意減之以腹內溫爲度。

小兒五色丹猪槽下爛泥傅之乾則易之以愈爲度。

又方服黃龍湯二合并傅瘡上。

小兒赤丹芸薹葉汁服三合滓傅上。

小兒赤丹斑駁唾和胡粉從外向內傅之良。

又方煅鐵屎爲末以豬脂和傅之。

又方屋塵以臘月豬脂和傅之。

小兒火丹赤如朱走皮中酢和豉研傅之卽愈。

又方.搗荏子傅之。

又方.猪屎水和絞取汁服少許。

小兒天火丹.赤如丹.大如手.偏身或痛或癢.生麻油塗之。

小兒火丹.其瘡見骨者.搗小蒜厚封之.着足踝者是。

小兒殃火丹.每着兩脇及腋下者.伏龍肝末.和油傅之.乾則易之.若入腹及陰.則以慎火草取汁服之。

小兒夜啼不已.醫所不治者.取狼糞中骨燒作灰末.水服.如黍米大二枚.其啼即已。

又方.取馬骨燒灰.傅乳上飲兒.即止。

小兒吐痢.燒特猪屎水解.取汁少少服之.良。

小兒大小便不通.灸口兩吻各一壯。

又方.搗白花胡葵子末.煮汁服之。

又方.雞屎白.服一錢匕。

又方.灸臍下一寸三壯.又灸橫紋百壯.又灸口兩吻各一壯。

小兒溫瘡.鹿角末.先發時.便服一錢匕。

又方.灸兩乳下一指三壯。

小兒洞注下痢。蒺藜子二升。搗汁溫服。以差爲度。

又方。木瓜搗汁飲之。

又方。炒倉米末飲服之。

又方。酸石榴燒灰。服半錢。七日三。

又方。炒豉令焦。水淋汁服之。神驗。冷則酒淋服。

小兒赤白帶下。薤白一把。豉一升。以水三升。煮取一升。分三服。

又方。柏葉一升。麻子末一升。以水五升。煮取三沸。百日兒。每服三合。

又方。搗石榴汁服之。

又方。亂髮灰、鹿角灰等分。三歲兒。以水和服三錢。七二。

中毒第三

凡卒死無脈無佗形候。牽牛臨鼻上二百息。牛舐必差。牛不肯舐。鹽汁塗面上。卽牛肯舐。

又方。牛馬屎。絞取汁飲之。無新者。水和乾者亦得。一法。以人溺解之。

又方。炙熨斗。熨兩脇下。又治尸厥。

覽外慎燈火。勿令手動。牽牛臨其鼻上。卽覺。

又力搗韭汁灌鼻孔中。劇者灌兩耳。一云灌口中。

鬼魅不悟。末伏龍肝吹鼻中。

又方。末阜角少大豆許吹鼻中。嚏則氣通。起死人亦治中惡。

又方。灸兩足大指叢毛中二七壯。亦救卒死中惡。

中惡。心黃刺鼻孔中。血出愈。一云入七八寸無苦。使目中血出差。一云男左女右。

又方。使人尿其面上愈。

中惡并蠱毒。冷水調伏龍肝如雞子大服之必吐。

又方。溫二升猪肪頓服之。

又方。車軛脂如雞子大酒服之。

又法。中惡灸胃管五十壯愈。

卒忤中惡也。鹽八合以水三升煮取一升半分二服得吐即愈。若小便不通。筆頭七枚燒作灰末水調服。

卽通。

又方。犧子屎半盞酒三升煮服之亦治霍亂。一云治鬼擊。又云大牛屎亦可用。

又方。書墨末之水服一錢匕。

又法卒忤死灸手十指爪下各三壯又灸人中三壯又灸肩井百壯又灸間七壯又灸巨闕百壯
卒中鬼擊及刀兵傷血漏腹中煩滿欲絕雄黃粉酒服一刀圭一日三服血化爲水
鬼擊之狀卒着人如刀刺胸腹絞痛或吐血或口鼻血出或下血雞屎白如棗大青花麻一把以酒七升
煮取三升熱服須臾發汗不汗熨斗盛火灸兩肋下熱汗出愈

又方艾如雞子大三枚以水五升煮取二升頓服

又方吹酢少許鼻中

救自縊死極須按定其心勿截繩徐徐抱解之心下尙溫者以氍毹覆口鼻兩人吹其兩耳立活

又方僵臥以物塞兩耳竹筒內口中使兩人痛吹之塞口傍勿令氣出半日死人卽噫噫卽勿吹也

又方搗阜角細辛屑如胡豆大吹之兩鼻中

又方搗藍青汁灌之

又方刺雞冠血出滴之中卽活男雌女雄

又方雞血塗

又方雞屎白如棗大酒半盞灌口及鼻中佳

又方蓼葉吹阜角末兩鼻中逆出更吹乃可

又方.梁上塵如大豆.各內一小竹筒子中.四人各捉一筒.同時吹兩耳兩鼻中.卽活.

又方.屏鼻口眼耳中.并捉頭髮如筆管大一撮.掣之立活.

又方.自縊死.灸四肢大節陷大指本文.名曰地神.各七壯.

熱渴著熱死者.取道上熱塵.以壅心上.若少冷.卽易氣通.卽止.

又方.仰臥渴人.熱土壅臍上.令人尿之.臍中溫.卽愈.

又方可飲熱湯.亦可內少乾薑橘皮甘草煮飲之.稍稍咽.勿使飽.但以熱土及熬灰土.壅臍上.佳.

又方.濃煮蓼取汁三升.飲之卽愈.如不愈.再飲.

又方.地黃汁一盞.卽愈.

又方.水半盞和麪一大抄服之.

又方.張死人口.令通以暖湯徐徐灌口中.小舉死人頭.令湯入腹.須臾卽蘇.

又方.灌地漿一盞.卽愈.

又方.使人噓其心.令暖易人爲之.

又方.抱狗子或雞.著心上.熨之.

又方.屋上南畔瓦.熱熨心.冷易之.

救落水死者以竈中灰布地令厚五寸以餌側著灰上令死人伏于餌上使頭少垂下抄鹽二方寸匕內竹管中吹下孔中卽當吐水水下因去餌下死人着灰中壅身使出鼻口卽活

又方掘地作坑熬數斛灰內坑中下死人覆灰溼徹卽易之勿令大熱燙人灰冷更易半日卽活

又方取大餌傾之死人伏其上令死人口臨餌口然葦火二七把燒餌中當死人心下令煙出小入死人鼻口中鼻口中水出盡則活火盡則復益之常以手候死人身及餌勿令甚熱當令火氣能使死人心下足得暖卒無餌者于岸側削地如餌空下如竈燒令暖以死人着上亦可用車轂爲之勿令隱其腹令死人低頭水得出并炒灰數斛令暖以粉身溼更易溫者

又方但埋死人暖灰中頭足俱沒惟開七孔

又方倒懸死人以好酒灌鼻中又灌下部又醋灌鼻亦得

又方縣裹阜角內下部中須臾水出

又方裹石灰內下部中水出盡則活

又方熬沙覆死人面上下有沙但出鼻口耳沙冷溼卽易

又方倒懸解去衣去臍中垢極吹兩耳起迺止

又方竈中灰二石埋死人從頭至足出七孔卽活

又方屈兩脚着生人兩肩上死人背向生人背即負持走行吐出水便活。

又方落水死解死人衣灸臍中凡落水經一宿猶可活。

冬日落水凍四肢直口噤有微氣者以大器中熬灰使暖盛以囊薄其心上冷卽易心暖氣通目得轉口迺開可溫尿粥稍稍吞之卽活若不先溫其心便持火灸身冷氣與火爭卽死。

卒中惡風心悶煩毒欲死者急灸足大指下橫文隨年壯卽愈。

上件病若筋急不能行者內踝筋急灸內踝上四十壯外踝筋急灸外踝上三十壯立愈。

卒中惡風眼戴睛灸目兩眴後二七壯。

上件病若不識人者灸季肋頭七壯。

卒中惡心痛苦參三兩咬咀以好酢一升取八合強人頓服老小二服。

又方桂心八兩咬咀以水四升煮取一升半分作二服。

飲食中毒第四

凡諸食中毒飲黃龍湯及犀角汁無不治也飲馬尿亦良。

又方食百物中毒掘地坑中著水取以飲之。

又方含貝子一枚須臾吐食物差。

又服生薺汁數升亦得。

中毒煩悶苦參三兩咬咀以酒二升半煮一升頓服之取吐愈。
食六畜肉中毒各取六畜乾屎末水服之佳。

食自死六畜肉毒服黃藥末方寸匕須臾復出。

又方燒小豆一升末服三方寸匕。

又方水服竈底黃土方寸匕。

食生肉中毒掘地深三尺取下土三升以水五升煮土五六沸取上清飲一升立愈。
食牛肉中毒狼牙灰水服方寸匕一作猪牙

又方溫湯服豬脂良

又方水煮甘草汁飲之。

食馬肉血洞下欲死豉二百枚杏仁二十枚咬咀蒸之五升米下飯熟搗之再服令盡。
又方蘆根汁飲以浴卽解。

食猪肉中毒燒猪屎末服方寸匕犬屎亦佳。

食百獸肝中毒頓服豬脂一斤佳。

食陳肉毒方同上

食馬肝中毒。牝鼠屎二七枚。兩頭尖者是以水研飲之。不差更作食野菜。馬肝肉。諸脯肉。毒取頭垢。如聚核大。吞之可起死人。

又方燒狗屎灰。水和絞取汁。飲之立愈。

又方燒猪骨末之。水服方寸匕。日三。

茅屋漏水沾肺上有毒。搗韭汁服之。良。大豆亦得。

肉閉在密器中者。名鬱肉。有毒。燒狗屎末。水服方寸匕。凡生肉熟肉。皆不藏蓋。不泄氣。皆殺人。又肉汁在器中密蓋。氣不出。亦殺人。

肺在黍米中有毒。麵一兩。水一升。鹽兩撮。煮服之。

食中射罔肺毒。末貝子。水服如豆。佳。不差。又服。

食餅臘中毒。方同上。

以肉作餅臘。食多吐下。服犀角末。方寸匕。甚良。

食鵝鴨肉成病。胸滿面赤。不下食者。服秫米泔。大良。

食中魚毒。煮橘皮湯。停極冷飲之。其效甚大。

食中魚毒及中鱸魚毒剉蘆根春取汁多飲良亦可取蘆葦莖汁飲之。

蟹毒方同上又冬瓜汁服二升亦可食冬瓜

山中木菌人屎汁服一升良

食魚膾不消燒魚鱗水服方寸匕

食諸鮑魚中毒方同上

食牛馬肉中毒飲人乳汁良

酒病豉葛白各一升以水四升煮取二升頓服之

飲酒中毒煮大豆三沸飲汁三升

又方酒漬乾榔汁服之

酒醉不醒葛根汁一斗三升飲之取醒止又治大醉連日煩毒不堪

千金寶要卷之二

解百藥毒第五

凡解百藥毒.甘草.薺.芫荽.大小豆汁.藍汁.藍實汁.藍根汁.並解.
雄黃毒.防已解.

舉石毒.大豆汁解.

金銀毒.服水銀數兩.卽出鴨屎解.水和雞屎汁.煮蓼汁.並解.

鐵粉毒.磁石解.

防葵毒.葵根汁解.

桔梗毒.白粥解.

甘遂毒.大豆汁解.

芫花毒.防己.防風.甘草.桂汁.並解.

大戟毒.菖蒲汁解.

蜀椒毒.葵子汁.桂汁.豉汁.人尿.冷水.土漿.蒜.雞毛燒吸煙.及水調服解.

斑貓羌青毒。猪脂大豆汁。或鹽藍汁。鹽湯煮猪骨。並解。

馬刀毒。清水解。

杏仁毒。藍子汁解。

野芋毒。土漿人糞汁解。

諸菌毒。掘地作坑。以水沃中。攬之令濁。澄清飲之。名地漿解。

解鳩毒。及一切毒藥不止者。甘草蜜四兩。梁米粉一升。以水五升。煮甘草取二升。去滓。歇大熱。內粉湯中。攬令勻調。內白蜜。更煮令熟。如薄粥。適寒溫。飲一升。最佳。

解一切毒。母猪屎水和服之。又水三升三合。和米粉飲之。

野葛毒。已死口禁者。取青竹去兩節柱。兩肋臍上。內冷水注之。暖即易之。須臾口開。開即服藥。立活。惟須數易水。

石藥毒。白鴨屎人參汁。並解。

食蕡菪悶亂。如卒中風者。飲甘草汁。藍青汁。卽愈。

中鈎吻毒。欲死者。薺危八兩。咬咀。以水六升。煮取三升。冷。如人體。服五合。日三夜二。凡煮薺危。惟濃佳。

又方。煮桂汁。飲之。

又方噉蓼涕

諸毒方同上

中蠱茜根蘂荷根各三兩咬咀以水四升煮取二升頓服

又方槲樹北陰白皮一大握長五寸水三升煮取一升空腹服卽吐蠱出

中蠱下血方同上

諸熱毒或蠱毒口鼻血出取人屎尖七枚燒作火色置水中研之頓服卽愈亦解百毒時氣熱病之毒服已溫覆取汗勿輕此方極神驗

諸服藥過劑悶亂者飲藍汁水和胡紛地漿蘂荷汁水和葛粉粳米瀋乾羌黃連飴糖豉汁並解瘡中水毒炭白灰胡粉等脂調塗瘡孔上水出則痛止

瘡中水腫方同上

卒刺手足中水毒搗韭及藍青薑上以火灸熱徹卽愈

破傷風腫厚塗杏仁膏然麻燭遙灸之

蛇蝎毒等第六

凡蛇毒消蟻注瘡上不差更消注之又以母猪耳中垢傅之牛耳垢亦可

蝮蛇毒令婦人尿瘡上。

又方令婦人騎度三過又令坐上。

又方末羌傅之乾則易。

又方以射罔塗腫上血出卽愈。

又方生麻楮葉合搗以水絞去滓瀆之。

衆蛇毒乾羌雄黃等分末和射罔着竹洞中有急用之。

又方雄黃末傅瘡上日一。

又方用銅青傅瘡上。

又方搗大蒜和胡粉傅之。

又方雞屎二七枚燒作灰投酒服之。

又方以麴闌上令童男尿其中燒鐵令赤投中冷復燒着二三度差。

又方口嚼大豆葉塗之。

又方猪脂和鹿角灰塗之。

又方鹽四兩水一斗煮十沸定以湯浸冷易之。

又方.搗紫莧取汁飲一升.以滓封瘡.以少水灌之.

又方.梳中垢如指大長一寸.尿和傅之.

又方.灸流汗出熨之.

又方.取合口椒胡荽苗等分搗傅之無不差.

又方.灸蟄處三七壯無艾以火頭稱瘡孔大小爇之.

蛇噉人屎厚塗帛裹即消.

睡中蛇入口挽不出.以刀破蛇尾內生椒三兩枚裹着須臾即出.

又方.艾灸蛇尾即出.

又方.以刀周匝割蛇尾截令皮斷仍將皮倒脫即出.

蛇入口並七孔者割母豬尾頭瀝血着口即出.

又方.以患人手中指等截三歲大豬尾以器盛血傍蛇瀉血口中拔出之.卒爲蛇繞不解以熱湯淋之.

又方.令人尿之.

蛇蝎螫服小蒜汁滓傅上.

又方熟搗葵取汁服。

又方取齒中殘飯傅之。

又方猪脂封之。

又方射罔封之。

又方硝砂和水塗上立愈。

又方若着手足冷水浸水微暖則易之着餘處冷水浸故布榆之小暖則易。

又方生烏頭末唾和傅之。

射工毒不治七日能殺人鬼臼葉一把內苦酒中漬之熟搗絞汁服一升日三爲妙。

又方取生吳茱萸莖葉一握斷去前後握中熟搗以水二升煮取七合頓服之立愈。

又方取葫切貼瘡灸七壯。

又方赤莧菜搗絞取汁一服一升日四五服。

又方白雞屎取白頭者三枚湯和塗中毒處。

已有瘡者取芥子熟搗苦酒和厚塗瘡上半日痛便止。

又方取狼牙葉冬取根搗之令熟口口中處又飲汁四五合。

蜘蛛入耳炒胡麻搗之以葛袋盛傾耳枕之卽出

又方以牛酪灌之滿耳卽出出□□消若入腹中空腹食好酪一二升卽化爲黃水而出不盡更服于真人自云手用神効

水毒凡山水有毒蟲人涉水中人似射工而無物其診法初得之惡寒微似頭痛目眶疼心中煩懊四肢
厥腰背百節皆強兩膝痛或翕翕而熱但欲睡旦醒暮劇手足逆冷至肘膝一三日腹中生虫食人下
部肛中有瘡不痛不癢令人不覺不急治過六七日下部出濃潰虫上食人五臟熱盛毒煩下利不禁
八九日良醫不能治矣不過二十日殺人欲知是中水與非者當作五六升湯以小蒜五升㕮咀投湯
中消息勿令大熱去滓以浴之是水毒身體當發赤斑無異者非也治中水毒取梅若桃葉搗絞取汁
三升許或乾以少水綃取汁飲之小兒不能飲以汁傅乳頭與喫

又方搗瘡耳汁服一升又以絲裹杖沾汁導下部日二過卽差

又方蓼一把搗以酒和絞取汁一升服之不過三服一作藜葉

又方藍一把搗水解以塗浴面目身體令遍

又方搗蛇莓根末水飲之并導下部生者用汁凡夏月行常多費此藥屑入水以方寸匕投水上流無所
畏又能辟射工凡洗浴以少許投水盆中卽無毒

人忽中水毒。手足指冷。或至肘膝者。浮萍暴乾末之。洒服方寸匕。

八九月中刺手足犯惡露腫殺人生桑枝三枝內燒灰中推引之令極熱研斷正以頭柱瘡口上熱盡即易之盡三枝則瘡自爛仍取薤白搗縣裹着熱灰中使極熱去縣取薤白傅瘡上以布帛急裹之若有腫者便作之用薤白第一佳。

竹木刺皮中不出羊糞燥者燒爲灰和豬脂塗刺若不出再塗一云用乾羊屎末。

又方服王不留行卽出兼取根末貼之。

又方煮山蘿麥汁飲之日三差止。

又方用牛膝根莖生者併搗以薄之卽出瘡雖合猶出。

又方嚼白梅塗之。

又方白茅根燒末以膏和塗之亦治瘡因風致腫。

又方燒鹿角末以水和塗之立出久者不過一夕。

又方頭垢傅之卽出。

惡刺苦瓠開口內兒屎煮三兩沸浸病上。

又方濃煮大豆汁漬取差。

又方.食箬根.水煮.浸之.冷復易.

喉痺金瘡等第七

喉痺.桂心末如棗核大.絲裹着舌下.卽破.

又方.荆瀝.稍稍咽之.

又方.只將頸上近頭心髮直上.作力提之.其喉痺.剝然一聲遂破.最奇.

墮落車馬.及車輶木打已死者.以死人安着.以手袖掩其口鼻眼上.一食頃活.眼開.與熱小便二升.

凡墮落傷損欲死.取淨土五升.蒸之令溜.分半.以故布數重裹之.以熨病上.勿令大熱.恐破肉.冷則易之.

取痛止則已.凡有損傷.以此法治之.神效.已死不能言者.亦活.三十年者亦差.

腕折骨損者.以大麻根葉搗汁.飲一升.無生麻.煮乾麻汁服.

腕折四肢骨碎.及筋傷蹉跌.生地黃不限多少.熟搗.用薄所損處.又云.爛搗.熬之.以裹傷處.以竹編夾裹.

令遍縛.令急.勿令轉動.一日可十易.三日差.若血聚在折處.以刀子破去血.

四肢骨碎筋傷蹉跌.豉三升.水三升.漬.取汁.服之.

頭破腦出中風口噤.大豆一斗.熬去腥.勿使太熟.搗末.熟蒸之.氣徧合.餌下.以酒一斗淋之.溫服一升.覆.

取汗.傅杏仁膏於瘡上.

凡被打損血闊搶心氣絕不能言可闢開口尿其中令下咽卽醒。

卒中毒矢搗藍汁一升飲之并薄瘡上若無藍取青布瀆絞汁飲之并淋瘡中。

又方內鹽臍中灸之。

又方煎地黃汁作丸服之百日矢當出。

又方煮蘆根汁飲三升。

又方多飲葛根汁并治一切金瘡。

又方末雄黃傅之當沸汁出愈。

又方末貝齒服一錢匕大良。

又方搗葛根汁飲之葛白屑熬黃傅瘡止血。

金瘡破腹腸突出欲令入取人屎乾之以粉腸卽入矣。

又被傷腸出不斷者作大麥粥取汁洗腸內之每研米粥飲之二十日稍稍作強糜百日後乃可差耳。

金瘡煩滿赤小豆一升以苦酒漬之熬令燥復漬滿三日令色黑服方寸匕日三。

箭鏃及諸刀刃在咽喉胸膈諸隱處不出者牡丹皮一分白鹽三分一方作白歛二味治下篩以酒服方

寸匕日三出。

又方取苦蘿汁塗箭瘡上卽出。
又方酒服蘿麥方寸匕日三差。

卒爲弓弩矢所中不出或肉中有聚血取婦人月經布燒作灰屑酒服之。

又方白斂半夏等分治下篩酒服方寸匕日三淺瘡十日出深瘡二十日出。

金瘡血出不止桑根十沸服一升卽止。

又方柳絮封之。

又方搗車前汁傅之血卽絕連根用立效。

又方飲人尿三升愈。

又方以蜘蛛幕貼之。

金瘡腹中瘀血大麻子三升大棗白二七枚使數人各搗令熟用九升水煮取一升半頓服之若血出不

盡腹中有濃血即合服當吐膿血耳。

金瘡內漏還自取瘡中血着杯中水和服。

又方七月七日麻勃一兩蒲黃六兩酒服一錢匕日五夜二。

又方牡丹皮爲散水服三指撮立尿出血。

金瘡若痛楊木白皮熬令燥末之服方寸匕日三又末傅瘡愈。

金瘡若刺瘡痛不可忍百治不差者蓼一把以水三升煮數沸漬洗瘡止痛良傷墜車馬及諸物隱體肉斷者以酢和麪塗之

筋骨傷初破時以熱馬尿傅之無癢。

又方大豆二升水五升煮取二升以醇酒六七升合和豆升服之一日盡如湯沃雪用小豆亦佳落車墜馬及木崩血腹滿短氣大豆五升以水一斗煮取二升去豆一服令盡劇者不過三作

金瘡便以石灰厚傅無石灰只灰亦可裹之止痛又速愈若深未宜速合者內少滑石令瘡不時合也針灸瘡血出不止燒人屎灰傅之

金瘡出血多其人必渴當忍之噉燥食并肥脂之物以止渴慎勿鹹食若多飲粥及漿犯卽血動溢出殺人又忌嗔怒大言笑思想陰陽行動作勞多食酸鹹飲酒熟羹臚葷瘡差後猶須如此出百日半年乃可復常也

又方燒乾梅作炭搗末傅之一宿卽差亦治被打傷又方磁石末傅之止痛斷血

又方桑白汁塗桑白皮裹或石灰封之妙

又方.麻葉三升.以水三升.煮取三升半.爲一服.

又方.飲麻子汁數升.亦治毒箭所傷.

又方.蚯蚓屎.以水服方寸匕.日三.

又方.杏仁石灰細末.豬脂和封.亦主大馬金瘡.

又方.搗穀子傅之.

瘡疽癰腫第八

發背亂髮灰酒.服方寸匕.亦治癰疽.

又方.飲鐵漿二升.取利.

又方.三年醋淬.微火煎令稠.和牛脂傅上.日一易.

又方.猪脂傅上.日四五.亦治發乳.

又方.猪羊脂切作片.冷水浸貼上.暖則易之.五六十片.差.初貼少許.卽寒.寒定.好眠.甚妙.

又方.燒鹿角灰.醋和傅之.日四五.

瘡疽手足肩背.累累如赤豆.剝之.汁出.蕪菁子熬.搗帛裹.展轉傅上.良.

又方.以麻子熬作末.摩其上.良.

又方酒和傅之。

又方剥去瘡痂，溫醋泔清洗之，以胡燕巢百日男兒屎如膏傅之。

又方亂髮灰服方寸匕，日三亦治發背。

又方煮芸薹菜取汁一升服之，并食乾熟芸薹數頓，少與鹽醬。冬月用其子水和服之。

又方以豬膽傅之良。

又方枸杞根、葵根葉煮汁煎如糖服之隨意。

又方臘月糖，晝夜浸之數日乃愈。

疽潰後鹽湯洗拭了燒臙角灰粉之良。

又方以牛耳中垢傅之良。

又方以生麻油滓裹帛瘡上重出。

又方以沸湯灌瘡中三四遍。

疽似癰而小有異，今日去膿了，明日還滿，膿如小豆汁者，芸薹熟搗濕布袋盛之，埋熱灰中，更互熨之，即快得安，不過再三，卽差，冬用乾者。

又方臙角煎湯洗拭乾，以蠟皮末傅勿令作痂。

一切腫毒痛不可忍者取草麻子搗傅之卽差。

惡毒腫一宿可殺人者茴香草搗取汁飲一升日三四服滓傅腫上冬中根亦可用起死神方魚臍丁瘡不大痛者殺人以寒食餳傅之良又硬者燒灰塗貼卽差。

又方先以針刺瘡上四畔作孔搗白芷取汁滴瘡孔內

丁腫忌見麻勃見卽死者以針刺四邊及中心塗雄黃末立愈一云塗黃土

又方鼠新坌土和小兒尿傅之

又方鐵衣末和人乳汁傅之立可

又方小豆花爲末傅之差

又方人屎尖傅之立差

又方以四神丹一枚當頭上安經宿則根出矣四神丹方在第十二卷中

凡腫病須百方內外攻之生商陸一斤豬脂一斤煎可得二升二味如煎令黃去滓以磨腫處亦可服少許并塗以繕漬之燥輒傅之不過三日差

因瘡腫痛者皆中水及中風寒所作其腫入腹則殺人溫桑灰汁漬之冷復溫之常令熱神祕治癰芫花爲末膠和如粥傅之

瘡發心胸以下者。武都雄黃松脂各三兩。和爲塊。刀子刮爲散。飲服方寸匕。日三不差。更合石癰。堅如石。不作膿者。生商陸根。搗傅之。乾則易之。取軟爲度。又治濕漏諸癰節。

又方。蜀桑根白皮。陰乾搗末。炷膠以酒和藥傅腫。卽拔出根。

又方。醋和蕡苔子末。傅頭上。卽拔出根。

又方。蛇脫皮貼之。經宿差。

又方。染上麌。葵根莖灰等分。醋和傅之。卽差。

又方。櫟子一枚。以醋于青石上磨之。以塗腫上。乾更塗。不過十度。卽愈。

又方。當上灸之百壯。石子當碎出。如不出。益壯乃佳。

癰腫痛煩悶。生楸葉十重貼之。以帛包令緩急得所。日二易。止痛兼消腫。膿其良勝于衆物。如冬月先

收乾者。用時鹽潤之亦可。薄消楸皮用之。

始覺腫令消。以蕡苔末三指撮水和服之。日三神良。

已結膿使聚。苦蘿蔔根末之苦酒和傅上。燥則易赤小豆亦佳。

癰腫。芥子末湯和傅紙上貼之。

又方。白蘆石末。蒜和搗傅上。差。

又方馬鞭草搗傅上卽頭出。

又方灸兩足大拇指奇中立差仍隨病左右。

癰無頭者吞葵子一枚不得多服。

又方燒葛蔓灰封上自消牛糞灰亦佳。

又方鼠粘根葉貼之。

又方水和雀糞傅之。

又方生椒末釜下土等分醋和塗之一法有麪末。

癰有膿令清雞羽三七枚燒末服之卽潰。

又方人乳和麪傅上比曉膿血出并盡不用近手。

又方箔經繩燒灰末臘月豬脂和傅下畔卽潰不須針灸。

膿潰後瘡不合熟嚼大豆傅之。

又方炒烏麻令黑熟搗傅之乾則易。

又方牛糞傅之乾則易。

又方燒破蒲席灰臘月豬脂和內孔中。

癰久不差。馬齒葉搗汁煎傅之。
爲度。

癰肉中如眼。諸藥不效。犯丁瘡。蕪菁根。鐵生衣等分和搗。以大針刺作孔。復削蕪菁根如針大。以前鐵生衣塗上。刺孔中。又塗所搗者。封上。仍以方寸匕。紺帛塗貼之。有膿出易之。須臾拔根立差。忌油膩生冷。醋滑五辛陳臭粘食。

又方。刺瘡頭及四畔。令汁極出。搗生粟黃傅上。以麴圍之。勿令黃出。從旦至午。根即拔矣。

又方。以麴圍瘡。如前法。以針亂刺瘡。銅器煮醋令沸。瀉麴圍中。令容一盞。冷則易之。三度即拔根出。

又方。取蛇脫皮如雞子大。以水四升煮三四沸去滓。頓服立差。

又方。取蒼耳苗搗取汁一二升飲之。滓傅上立差。

一方。灸掌後橫文後五指男左女右七壯。

癰肉中如眼。諸藥不效。取附子削令如碁子。安腫上。以唾貼以火灸之。令附子欲焦。復唾濕。復以火灸之。如是三度。令附子熱氣微內即差。

一切毒腫疼痛。取草麻子熟搗傅之。即差。

脚腫向上至腹卽殺人者赤小豆一斗以水三斗煮令爛出豆以汁浸脚至膝每日一度差止若已入腹不須浸但煮豆食之忌鹽菜米麪等渴飲汁差乃止

瘡久不差差而復發骨從孔出名骨疽以猪脂和椒葉搗封之

又方搗白楊葉傅之

又方蕷菁子搗傅之帛裹一日一易

又方穿地作坑口小裏大深三尺取乾雞屎二升以艾及荆葉搗碎和雞屎令可然火坑中燒之令煙出將疽就坑口熏之以衣擁口勿泄氣半日當有蟲出甚效

附骨疽槲皮燒灰飲服方寸匕

又方灸間使後一寸隨年壯立差

一切丁腫蒼耳根莖苗子但取一色燒爲灰酢泔淀和如泥塗上乾則易之不過十度卽拔根出神良

又方取鐵漿每飲一升立差

又方麴和臘月猪脂封上立差

又方蒺藜子一升燒灰釀醋和封上經宿便差或針破頭封上更佳

又方皁角子取仁作末傅之五日內差

又方艾蒿一擔燒作灰于竹筒中淋取汁以一二合和石灰如麪漿以針刺瘡中至痛卽點之點三遍其根自拔。

赤眼丁熬白粉令黑蜜和傅之良。

又方以新塗鼠壤水和塗之熱則易之。

又方搗馬牙齒末臘月猪脂和傅之可拔根出亦燒灰用。

火燒瘡慎不得以冷水洗熱得冷更深入骨壞人筋骨□□初被火燒急更向火灸雖大痛強忍之一食久卽不痛神驗。

又方家中一女子火燒手且浸浸至掌急以酸酢升餘浸之出酢尙痛時不痛止不瘡不曬不瘢神妙神妙。

又方未熬油麻和梔子仁塗之惟厚爲佳。
又方已成瘡者燒白糖灰粉之卽燥立差。

因瘡而腫痛劇者數日死或中風寒或中水或中狐尿刺燒黍穰若牛馬屎若生桑條燒取多煙以薰之汗出愈如無生桑條取得多煙之物燒薰汗出愈。

又方熱蠟內瘡中新瘡亦善。

又方以鼎公英草根莖白汁塗之惟多塗爲佳大神効此草蜀中名耳癥菜關中名苟乳乳奴狗切腸癰雄雞頂上毛并屎燒作末空心酒服

又方截取擔頭尖少許燒作灰水和服當作孔出膿血愈

又方瓜子三升末之以水三升煮取一升五合分三服

又方死人冢土十作泥塗之

內癰未作頭者服雞屎即差

又方腸癰屈兩肘正灸肘頭銳骨各百壯則下膿血即差

婦人妬乳取葵莖灰末之飲服方寸匕日三口口口法爲末不爲灰

又一方取研米槌三枚灸令熱以絮及故帛搗乳上以槌更互熨之差止

乳癰以水罐盛酢泔清燒石令熱內中沸止更燒如前少熱內乳潰之冷更燒石內潰不過三燒石即愈

又一方取蓼白搗傅之并紋汁一升頓服即愈

又方柳根削取上皮搗令熟熬令溫盛練袋中熨乳上乾則易之一宿即愈

又方鹿角治下篩以豬脂上清汁服方寸匕不過再服亦可以醋漿水服

千金寶要卷之三

霍亂吐瀉第九

霍亂轉筋蓼一把去兩頭以水二升煮取一升頓服之。一方作梨葉。

又方燒故木梳灰末之酒服一枚小者永差。

又方車穀中脂塗足下差。

又方作極鹹鹽湯千槽中煖漬之。

又方以醋煮青布搘之冷復易之。

轉筋不止若男子以手挽其陰牽之女子挽其乳近左右邊。

轉筋在兩臂及胸中者灸手掌白肉際七又灸竈中中府巨闕胃管尺澤并治筋拘頭足皆愈。

霍亂引飲飲輒乾嘔生薑五兩㕮咀以水五升煮取二升半分二服高良薑大佳。
中熱霍亂暴利心煩脈數欲得冷水者新汲井水頓服一升立愈先患胃口冷者勿服之。
霍亂吐下腹痛以桃葉煎汁服一升立止冬用皮。

走哺轉筋灸踵踝白肉際各三七壯又灸小腹下橫骨中央隨年壯。

轉筋四厥灸兩乳根黑白際各一壯。

轉筋灸湧泉六七壯在足心下當拇指大筋上又灸足大趾下約中一壯。

又方轉足踝聚筋上白肉際七壯立愈。

轉筋入腹痛欲死四人持手足灸臍上一寸十四壯自不動勿復持之又灸股裏大筋去陰一寸。

霍亂轉筋令病人合面正臥伸兩手著身以繩橫量兩肘尖頭依繩下夾脊骨兩邊相去各一寸半灸一百壯無不差。

霍亂已死有煖氣者灸承筋取繩量闊足從趾至跟匣捻取等折一半以度令頭至跟踏地處別綻上至度頭即是穴灸七壯起死人又以鹽內臍中灸二七壯。

霍亂洞下不止艾一把水三升煮取一升頓服之良。

又方香茅一把水四升煮取一升頓服之青木香亦佳。

蠱毒宿食不消霍亂極鹹鹽湯三升熱飲一升刺口令吐宿食使盡不吐更服吐訖復飲三吐乃住此法大勝諸治俗人以爲田舍淺近法鄙而不用守死而已凡有此病卽須先用之。

又方萹豆一升香薷一升以水六升煮取二升分服單用亦得。

胞轉小便不通亂髮急纏如兩拳大燒末醋四合和二方寸匕服之訖卽炒熟黑豆葉蹲坐其上。

又方.阿膠三兩.水二升.煮取七合.頓服之.

又方.豉五合.以水三升.煮數沸.頓服之.

又方.麻子煮取汁.頓服之.

又方.連枷關燒灰.水服之.

又方.筆頭燒灰.水服之.

又方.灸玉泉七壯.穴在關元下一寸.大人從心下處取八寸.是玉泉穴.小兒斟酌取之.

又法.灸第十五椎五十壯.

又法.灸臍下一寸.隨年壯.一曰四寸.

吐逆霍亂吐血.灸手心主五十壯.

吐血生地黃肥者五升.搗以酒一升煮沸.三上三下去滓.頓服之.

又方.服桂心末方寸匕.日夜可二十服.亦治下血.

忽吐血.熟艾三雞子許.水五升.煮取二升.頓服.

又方.燒亂髮灰.水服方寸匕.日三.亦治舌上忽出血如簪孔者.亦治小便出血.
中蠱下血日數十行.苦瓠一枚.以水二升煮取一升.稍稍服之.當下蠱.及吐蝦蟆科斗之狀.一月後乃盡.

又云苦瓠毒當臨時量用之。又云用苦酒一升煮。

虎犬馬傷第十 针折入肉附

虎咬瘡。煮葛根令濃以洗之。十遍飲汁及搗爲散。以葛根汁服方寸匕。日五。甚者夜二。又方。青布急卷爲繩。止一物燒一頭然內竹筒中。注瘡口薰之妙。

又方。煮鐵令濃。洗瘡。

又方。嚼栗子塗之良。

剝死馬骨傷人。毒攻欲死。便取馬腸中屎塗之。大良。

又方。取其屎燒灰。服方寸匕。

狂犬咬人。毒有七日一發。百日內殺人者。每到七日。搗韭汁飲一二升。當終身禁食犬肉蠶蛹。若犯則死。不可救。瘡未愈之間。禁食生魚及諸肥膩冷食。但于飯下蒸魚。及于肥器中食。便發不宜飲酒。過一年乃佳。

獅犬噉人。搗地榆。紋汁塗瘡無生者。取乾者以水煮汁飲之。亦可。末之服方寸匕。日三。兼傅之。過百日止。又方。搗韭絞汁飲一升。日三。瘡愈止。

又方。以豆醬清塗之。日三四。

又方.刮虎牙或骨服方寸匕。

獮犬毒燒虎骨傅瘡及熨。又微熬杏仁搗研取汁服之良。又取燈蓋殘油灌瘡口此皆禁生菜猪肉魚酒。又方用韭根故梳二枚以水二升煮取一升頓服。

又方桃東南枝白皮一握水二升煮取一升分二服吐出犬子。

又方服良蒡子七枚日一

又方梅子末酒服

獮犬所留惡血未盡灸上一百壯以後當日灸一壯若不血出刺出其血百日灸乃止禁飲酒猪犬肉。

凡犬噉人以熱牛屎塗之佳

針折入肉中刮象牙末水和聚着折針上卽出

又方磁石吸鐵者着上卽出

舌耳心目等大小便第十一

舌卒腫滿口溢出須臾不治殺人急以指刮破舌兩邊去汁卽愈

又方取釜下墨以酢厚傅舌上下脫去更傅佳

又方半夏十二枚洗熟以酢一升煮取八合稍稍含漱之吐出加生薑一兩佳。

又方.滿口含糖酢少許時.熱通卽止.

舌上出血如泉.燒鐵篦熟烙孔中良.

舌強不語.礬石桂心等分爲末.安舌下立差.

耳中有物不可出.以弓弦從一頭令散.傅好膠.注耳中物上.停之.令相着.徐徐引之.耳聾.乾耵聹不可出.三年酢灌之.最良.絲塞之.半日許必有物出.

百虫入耳.末蜀椒一撮.以酢半升.調灌耳中.行二十步.卽出.

又方.桃葉火熨卷之.口塞耳立出.

又方.車肝脂傅耳孔.自出肘後.以療聰耳.膿血.

又方.以蓼涕灌耳中.虫卽出.亦治耳聾.

齒斷間血出不止.生竹茹二兩.醋煮含之.

又方.溫童子小便半升.取三合含之.其血卽止.

九孔出血.搗荆葉取汁.酒服二合.一卽荆芥.

九種心痛.取當太歲上新生槐枝一握.去兩頭咬咀.以水三升煮.取一升.頓服.

又方.桃白皮煮汁.空腹以意服之.

婦人心痛布裹鹽如彈丸燒作灰酒服

又方燒秤錘投酒中服佳

又方炒大豆投酒中服佳

產後卒心腹痛桂心三兩酒三升煮取二升去滓分三服日三

又腹中苦痛生牛膝五兩酒五升煮取二升去滓分二服若乾牛膝根卽酒浸一宿方可煮

奔豚氣急作湯以浸兩手足數數易之

又方灸章門百壯一名長平二穴在大橫外直臍肋端

又方灸氣海百壯穴在臍下一寸半

又方灸關元百壯在臍下三寸

又方灸中極五十壯在臍下四寸

又方灸期門百壯直乳下第二肋端傍一寸五分

又方灸四滿二七壯穴夾丹田兩傍相去三寸卽心下八寸臍下橫文是也

奔豚腹中與腰痛灸中府百壯穴在兩乳上三肋間

耳聾有膿不差有虫先以絲繩去耳中汁以礬石末粉其上食久乃起不過再永差

聰耳桃仁熟搗以故紺絹裹內耳中日三易以差爲度。

治底耳黃礬燒絲裹內耳中不過三日愈或以葦管吹耳中。

治虫心痛鶴蠶末之密和梧子大服四十九日三蜜湯下加至五十九慎酒肉。

又方鶴蠶一兩末之空腹溫醉一盞和服之虫當吐出。

又方服漆一合。

熱翳漫睛以羊筋漱口熟嚼夜臥開目納之卽閉目睡去膜明日差亦治咪目。

眼暗以銅器盛大酢三四升煎七八日覆器溼地取銅青一合以三月杏白仁一升取汁和銅青傅之日

不過三四度大良。

又方含黃蘖一爪甲許使津置掌中拭目訖以水洗之至百日眼明此法乃可終身行之永除眼疾神良。

雀目術令雀目人至黃昏時看雀宿處打令驚起雀飛乃咒曰紫公紫公我還汝盲汝還我明如此日日暝三過作之眼卽明曾試有驗。

大小便不通葵子末一升青竹葉以水二升煮五沸頓服。

又方葵子一升榆皮一升水五升煮取二升分三服。

又方葵子一升以水三升煮取一升去滓納豬脂一升空腹分二服。

又方.瓶帶煮取汁.和蒲黃方寸匕.日三服.

又方.猪脂一升.以水二升煮三沸.飲汁立通.

又方.灸臍下一寸三壯.

失欠頰車蹉.一人以手指牽其頤.以漸推之.則復入矣.推常疾出指.恐悞齒傷人指也.

又方.消蠟和水傅之.

目眩不出.以蠶沙一粒吞之.卽出.

卒食物入鼻.有入腦.羊脂如指大.內鼻中吸上.物隨脂下.

鼻中出血不止.搗楮葉汁飲三升.大良.

齒痛.蚯蚓糞水和作稠泥團以火燒之.令極赤.如粉.以臘月猪脂和傅斷上.日三兩度.永差.

又方.馬齒菜一把.嚼之.卽差.

齒根動欲落.生地黃絲裹着齒上.咋之.及咬咀.以汁漬齒根.日四五.并咽汁.十日.大佳.
大便難.好膠三寸.茭白一把.以水四升煮取一升半.頓服之.卽下.

又方.葵子汁和乳汁等分.服之.立出.

大便失禁.不拘老人小兒.灸兩脚大指.去甲一寸三壯.又灸大指奇間三壯.

小便不通水四升洗餽帶取汁煮葵子取二升半分三服。又方胡燕糞各一合和搗丸如梧桐子大服三丸日三。又方髮去垢燒末一升葵子一升以飲服方寸匕日三。

又方石槽塞灰土井花水服之日三。

又方服車前子末方寸匕日三百日止。

卒不得小便車前草一把桑白皮半兩咬咀以水三升煎取一升頓服之。

婦人卒不得小便者杏仁二七枚熬末服之立通。

又方紫菀末井花水服三指撮立通血出四五度服之。

大小便不利葵子二升消石二兩以水五升煮取二升分再服。

小便不利大便數注灸屈骨端五十壯。

胃反食則吐搗粟米作麪水和作丸如楮子大七枚爛煮內酢中細細吞之得下便已麪亦得用之。胃反食即吐出上氣蘆根茆根各二兩細切以水四升煮取二升頓服之得下良。

又方飲白馬尿卽止。

又方淘小芥子暴乾爲末酒服方寸匕日三。

又方灸兩乳下各一寸以差爲度

上氣上酥一升獨頭蒜五顆先以酥煎蒜黃出之生薑汁一合共煎令熟空腹溫服方寸匕
上氣嘔吐芥子二升末之蜜丸寅時以井花水服如梧子大七丸日二亦可作散酒浸服治臍下絞痛
腳氣入腹困悶欲死吳茱萸六升木瓜兩箇切以水一斗三升煮取三升分三服如人行十里久再進一
服或吐或汗或利或大熱悶卽差此起死人方

卒嘔滿口着蜜食之卽下

又方刮椿杵頭細糠舍之卽下

又方老牛涎棗核大水中飲之終不復嘔

齶齒及虫痛切白馬懸蹄如米許以絲裹着痛處孔中不過三度

又方家中法以煮酒蠟少許任在虫孔子中以熱火筋烙之令蠟融于孔立愈

熱病後眼暗失明以羊膽傅之旦暮各一

明目令髮不落牛膽中漬槐子陰乾百日食後吞一枚十日身輕三十日白髮再黑百日通神

明目小黑豆每日空心吞二七粒

又方三月三日採蔓菁花陰乾治下篩空心井花水服方寸匕久服可夜讀細書

目赤及翳。烏賊骨鉛丹。大小等分合研細。和白蜜如泥。蒸之半食久冷。着眼四皆日一治三十年。聾故鐵三十斤。以水七斗。浸三宿。取汁入麴釀米七斗。如常造酒法候熟。取磁石一斤。研末。浸酒中三日。乃可飲。取醉。以絲裹磁石。內耳中。好覆頭臥。酒醒去磁石。卽差。

耳聾鳴。汁出一二十年不差。礬石少許。以生菖蒲根汁。和點入耳中。

耳聾。巴豆十四箇。成鍊。松脂半兩。合治丸。如黍米大。絲裹。以簪頭着耳中。一日一易藥。如硬微火灸之。以汁出乃愈。妙。

又方。菖蒲附子等分末之。以麻油和。以絲裹。內耳中。

又方。芥子搗碎。以男兒乳和絲裹內之。

又方。作一坑。可容二升許。着炭火其中。坑似窖形。以磚覆口上。磚上作一孔。可容小指。磚孔上着地黃一升。以木盆覆之。以泥泥盆下。勿泄。盆底上鑽一小孔。可容筋。其孔上着三重布。以耳孔當盆上。熏久。若悶。去黃水。髮裏鹽塞之。不過二三度。神効。

又方。酒三升。浸牡荆子二升。碎之。浸七日。去滓。任性服盡。三十年聾亦差。

又方。硫黃雄黃各等分末之。絲裹。內耳中。數日。聞人語。

中風大風水氣第十二

大風半身不遂。蠶沙兩石熟蒸作直袋三枚。各受七斗熱盛一袋着患處。如冷即取餘袋。一依前法數數易。百不禁差止。須羊肚釀粳米。茭白。薑。椒。豉等爛煮熟喫。日食一枚。十日止。千金不傳。

百種風灸腦後項大椎平處兩廂量二寸三分各灸百壯得差。須取病人指寸量。

卒病惡風欲死。灸第五椎名曰藏輸一百五十壯三百壯便愈。

中風口僻眼急諸藥不能差者。枳實上青刮取末。欲至心止。得茹五升微火炒去溼氣。以酒一斗漬微火暖。令得藥味隨性飲之。大驗治緩風急風並佳。

中風口喎炒大豆三升令焦。以酒三升淋取汁。頓服之。口噤不開亦治。

又方大阜角一兩去皮子下篩。以三年大酢和左喎塗右右喎塗左乾更塗之。

卒氣短搗韭汁服一升立差。

大風疾。煉松脂投水中二十偏蜜丸。服三兩。飢便服之。日三。鼻柱斷離者三百日服之。差斷鹽及雜食房室。

又方天門冬酒服百日愈。

大風灸百會七百壯。

腎寒灸腎輸百壯。

中風口渴。灸手交脈三壯。左灸右。右灸左。其炷如鼠屎。橫安之。兩頭下火。

風勞毒種。疼痛攀急。桃仁一升。研如常法。以酒三升攪和。頓服之。厚衣蓋令汗。不過三劑。猥退。風草麻子脂一升。酒一斗。銅鉢盛着酒中。一日。煮之令熟。服之。

失音。濃煮桂汁一升。覆取汗亦可。末桂着舌下。漸漸咽汁。

又方。濃煮大豆汁含亦佳。無豆用豉。

歷節風。松膏一升。酒三升。浸七日。服一合。日再數劑愈。

冷氣氣短。蜀椒五兩。絹袋盛。以酒一斗。浸之三七日。服之。任意多少。

卒上氣鳴急。便欲死者。搗韭汁服一升。良。

乏氣。枸杞葉。生薑各二兩。咬咀。以水三升煮。取一升。頓服。

心腹冷痛。熬鹽一斗。熨。熬蠶沙燒磚石蒸熨。取其裏溫暖止。蒸土亦大佳。

虛勞浮腫。灸太衝百壯。又灸腎輸。

虛勞不得眠。酸棗榆葉等分。末之。蜜丸如梧子大。每服十五丸。日再。

又方。乾薑四兩。末。湯和。頓服。覆取汗愈。

一切虛羸。鹿骨一具碎。枸杞根切二斤。二味各以水一斗。別器各煎汁五升。去滓。澄清。仍合一器。共煎。取

五升日二服盡好。將慎皆用大斗。

補虛羸。九月十日取生溼枸杞子一斗酒六升煮五沸出取研之熟瀝取汁令其子極淨暴子令乾搗末合前汁微火煎令可丸酒服二方寸匕日二加至三方寸匕亦可加至五十九

腹脹滿繞臍結痛堅不能食灸中守百壯穴在臍上一寸一名水分

脹滿氣聚寒冷灸胃管百壯三報穴在鳩尾下三寸

脹滿痕聚滯下冷疼灸氣海百壯穴在臍下一寸忌不可針

脹滿氣如水腫狀小腹堅如石灸膀胱募百壯穴在中極臍下四寸

脹滿腎冷痕聚洩利灸天樞百壯穴在臍旁相對橫去臍兩傍各二寸

諸冷極馬蘭子九升淨治去土空腹服一合日三飲及酒下之服訖須臾以食壓之取差乃止

骨蒸天靈蓋如梳大灸令黃碎以水五升煮取二升分三服起死人神方

又方取人屎灰以酒服方寸匕日三

走疰燒車釭令熱暫入水以溼布裹熨之

三十年氣疰鼓心半升生椒一合以水二升煮取半升適寒溫用竹筒縮取汁令病者側臥以手擘大孔射灌之少時當出惡物此法垂死悉治得差百千不可具述

欬嗽。胸脇支滿多唾。上氣酒一升半。浸肥阜莢兩挺。經宿煮取半升。分三服。七日忌如藥法。若吐多。以醉飯三四口止之。

又方。薑汁一升半。沙糖五合。煎薑汁減半。內糖更煎服之。

又方。白糖五分。微煅令消。內阜莢末。方寸合利相得。先食服。如小豆二丸。

又方。服芥子七丸。以油酒下之。

上氣欬嗽。乾羌末三兩。膠飴一斤。二味和令調。蒸五升米下。以棗大含。稍稍咽之。日五夜二。卅年嗽百部根二十一斤。搗取汁。煎如飴。服方寸匕。日三。

又方。白蜜一斤。生羌二斤。取汁二味。先將銅跳秤知斤兩訖。內蜜復秤知數。次內羌汁。以微火煎。令羌汁盡。惟有蜜斤兩在。丸如棗大。含一丸。日三。禁一切雜食。

又方。紫菀二兩。款冬花二兩。末之。食後以飲服方寸匕。日三。七日差。

久水腹大如鼓。烏豆一斗。熬令香。勿令大熟去皮。爲細末。餳粥皆得服之。初服一合。稍加之。若初服多。後卽嫌臭。服盡卽更造。取差止。不得食肥膩。渴則飲羹汁。慎酒肉。猪雞魚生冷。酢滑房室。得食漿粥。牛羊兔鹿肉。此據大飢渴時食之。可忍亦勿食也。此病難治。雖諸大藥丸散湯膏。當時雖差。過後復發。惟此散差後不發。終身服之。終身不發矣。其所禁食物。常須少噉。莫隨意鹹物。諸雜食等。

又方草薢末二寸匕，蒼耳子灰二寸匕，調和水服之。日二。

又方椒目沉水者，取熬之，搗如膏，酒服方寸匕。

又方水煮馬兜零服之。

水腫利小便。草薢四兩生用，桂心一兩末之，蜜飲下梧子大七丸。日二，以知爲度。

又方牽牛子末之，水服方寸匕。日一利止。

又方郁李仁末，麴各一升，和作餅子七枚，燒熟空腹熱食四枚，不知更加一枚，加至七枚。

大水頭面偏身腫脹，苦瓠白穰實，捻如大豆，以麴裹煮一沸，空腹吞七枚，至午當出水□升三四日，水自不出止，大瘦乃差。三日內慎口味也。苦瓠須好，無厭駁細理，研□□□□有毒不堪用。崔氏用子作餌，鈍服二七枚，若恐虛者，牛乳服之。如此隔日作服，漸加至三七枚，以小便利爲度。小便若太多，卽二日停止。

水通身腫，煎豬椒枝葉如餳，空腹服一匕，日三，痒以汁洗之。

又方苦瓠膜二分，葶藶子五分，熬搗爲丸，如小豆大，服五丸。日三。

又方單服牛尿，大良。凡病水無不差。服法先從少起，得下爲度。

又方大棗肉七枚，苦瓠膜如棗核大，搗丸一服三丸，如行十五里久，又服三丸，水出更服一丸，卽止。

又方煎人尿令可丸如小豆大日三服。

又方葶苈桃仁各等分皆熬合搗爲丸服之利小便一曰用杏仁。

又方搗生葶苈子酢和服以小便數爲度。

又方燒姜石令赤內黑牛尿中令熱服一升日一。

又方灸足第二趾上一寸隨年壯又灸兩手大指縫頭七壯。

凡卒中風口渴以葦筒長五寸以一頭刺耳孔中四畔以麪密塞之勿令泄氣一頭內大豆一顆并艾燒之令然灸七壯即差患右灸左患左灸右耳病亦灸之若不能語者灸第三指上百壯若眼反口噤腹中切痛灸陰囊下第一橫理十四壯人卒死者灸法同之破傷風腫厚塗杏仁膏燒麻燭遙灸之。

刺傷中風水刮箭羽下漆塗之。

又方服黑牛熱尿一服一升三服即止。

又方煮韭熟搗之。

又方蠟一兩熱灸熨薄裹其上水出愈。

千金寶要卷之四

瘧痢癥等第十三

凡下痢熱烏梅一升黃連一斤金色者末之蜜和如梧子大二十丸日三夜二積久三十年常下痢赤松皮去上蒼皮切一斗爲散麴粥和一升日三服百日差。

下血日夜百七八十行黃連黃蘖各四兩咬咀醇酢三升煮取一升半分再服。

赤白帶下亂髮雞子大燒末水服不過三

下冷臍下攬痛赤石脂乾薑各十兩丸如豌豆服十九日三加至二十九

卒下痢黃連五兩生薑一斤㕮咀以水五升煮取一升頓服未止更服

久冷白痢日夜五六十行大小腹痛不可忍好麵末五升微熬令和溫清酒令熱和麵末一升空腹頓服

日三服若至食時搗蒜一升令至熟下薑椒調和如常食法惟須稠勿加鹽以水和麵二升作索餅極爛煮之乾澆熱內蒜薑臼中相和一頓食之少與餘食至飢時仍準前食麵末酒比至差不過兩日久冷或痢或不痢但患腰腹苦冷者上等新蜀椒三升用酢宿漬之以麵三升和椒一升緊拌煮作粥空腹頓服之加蓼豉鹽任性調和不差更作以差爲限不過三升椒卽愈此不但治冷大治諸虛損冷極

有所益久當自知耳。

瘧或間日或夜發者燒黑牛尾頭毛作灰酒服方寸匕日三。又方無問新久者小便一升半蜜三匕同煮三沸頓服每發日平旦時服自至發勿食重者漸退不過三服差。

一切瘧無問遠近正仰臥以線量乳間中屈從乳向下灸度頭隨年壯男左女右

五臟諸瘧灸尺澤七壯穴是肘約上動脈

禳瘧法未發前抱一大雄雞時時驚動令雞作大聲立差。

卒暴癥腹中有物堅如石痛如研刺晝夜啼呼不治百日必死牛膝二斤㕮咀暴之令乾以酒一升浸之密塞氣口煎取半服半升一服便吐去宿食神効。

又卒暴癥取商陸根搗碎蒸之以新布藉腹上以藥鋪布上以衣物覆藥上冷復易之數日勿息。凡所食不消取其餘類燒作末酒服方寸匕便吐去宿食即差如食桃不消者以時無桃就樹間得槁桃燒服亦可。

卒食不消欲成癥積者煎艾汁如飴取半升作一服便利吐去宿食神良。

又方白艾五尺圍一束薏苡根一大把二味煎服。

食魚肉等成癥結，并諸毒氣，狗屎五升燒末，以酒一斗浸再宿，瀝取清分十服。日三服，三日使盡，隨所食便出矣。

雜中食癰實不消，心腹堅痛，以水三升煮白鹽一升，令消分三服，自吐亦治暴癰。

患癰結病及爪病似爪形，日月形或在臍左右或在臍上下，若鱉在左右肋下或當心如合子大，先針其足以椒熨之，取一新大盆受一斗者，盆底鑽一百二十孔，孔上着椒三合，上着一重紙，紙上着冷灰一升，灰上着熱灰半升，上着剛炭火一斤，經一食頃，盆底熱徹，當病上初安，既一重，卽安火盆，火盆大熱，以漸更加一重，若火更熱不可忍，加至三重，暫歇一口冷飲，還上火消二分許，則停經三日，□□及至七日，決得頓差，然後食美食自補，若小不差，作露宿丸服之，方在第十六卷中。

鱉癰腹堅硬，腫起大如盆，眠臥不得，取藍一斤搗水三升，綃取汁合一升，日二。

又方，蒴蘆根、白芨一握研取汁，水和服之。

食□得病爲鱉癰，在心下堅強，雞屎一升炒黃，取五合，以酒一升浸半爲末，以所浸酒服方寸匕，日二三，日中作一劑。

蛟龍病，開皇六年三月八日，有人食芹得之，其人病發似癩癰，面色青黃，因食寒食餳過多，便吐出蛟龍，有頭及尾，從茲有人患此疾，令服寒食餳二斗，大驗。

米癥常欲食米若不得米則胸中清水出雞屎一升白米五合合炒令米焦搗末以水二升頓服取盡須臾吐出病如研米若無米當出痰自此永憎米不復食

頭風吐逆第十四

凡食後吐酸水乾薑茱萸各二兩治篩酒服方寸匕日二胃冷服之立驗

嘔噦蘆根切三升以水一斗煮取四升分四服

乾嘔吐逆涎沫出者半夏乾薑等分咬咀以漿水一升半煮取七合頓服之日三

乾嘔酒浸馬屎一宿取汁服之

又方灸心主尺澤亦佳

又方灸乳下一寸三十壯

乾嘔不止粥食湯藥皆吐不停灸手間使三十壯若四厥脉沈絕不至者灸之便通此起死人法治嘔煮豉三升飲汁佳

又方空腹飲薑汁一升

又方濃煮蘆根汁飲之

又方灸承漿七壯炷如麥大又灸臍下四指七壯

惡心苦瓠穢，并子一升碎以酒水三升煮根一升頓服須臾吐下如蝦蟆衣三升。

又方服小便百日佳。

又方麻子一升熬令香熟搗取酒三升熟研濾取一升飲盡日二服盡口石差一切病自能食飲不能潤者任性多少。

飲輒吐頓服生熟湯三升卽止。

吐逆食不住灸胃管百壯三報。

吐逆飲食卻出灸脾募百壯三報章門也。

咽痛逆氣不能食麻子一升熬令黑以酒一升淋取汁空心一服一升漸至二升多汗好覆勿觸風冷此方兼理產婦及丈夫中風如角弓反張口噤不開。

治婦人氣平旦服烏牛屎日一止。

腰痛以酒單服鹿茸與角方寸匕日三。

腰臂痛導引法正東坐收手抱心一人于前據蹠其兩膝一人後持其頭徐牽令偃臥頭到地三起三臥止便差。

腰痛灸法宜針決膝腰句尺一中青赤路脉出血便差。

又方灸脚跟上橫文中白肉際十壯良

又方灸足巨陽七壯巨陽在外踝下

又方灸腰自窮七壯在尻上約左右

又方灸八竅及外踝上骨約中

腰卒痛灸窮骨上一寸七壯左右各一寸七壯

頭風大豆三升炒令無聲先以一斗二升瓶盛清酒九升乘豆熱即傾酒中密泥頭七日溫服之

又方服荆瀝不限多少取差止

又方搗蒴蘋根一升酒二升漬服汗出止

又方末蔓荆子二升酒一升絹袋盛浸七宿溫服三合日三

又方臘月烏雞屎一升炒黃末之絹袋盛以酒三升浸溫服任意常令醺酣

又方七月七日麻勃三升麻子一石末相和蒸之沸湯一石五斗三徧淋之煮取一石神麩二十斤漬之令發以黍米兩石五斗釀之熟封三七日服清一升百日身中澀皮入風胸膈五臟骨髓伏風百病悉

去之

頭風沐方草蘆子煮沐不過三四度愈

又方。蜀椒二升。以水煮取汁。沐髮良。

白屑。以桑灰汁沐頭去白屑。神良。

白髮還黑。烏麻九蒸九暴末之。以棗肉丸。久服之佳。

又方。隴西白芷。旋覆花。秦椒各一升。桂心一尺。治下篩。以井花水服方寸匕。日三三十日。白髮還黑。禁房室。

千金寶要卷之五

疫瘴渴淋第十五

令瘧不相染人汲水瓶上繩長七寸盜着病人臥席下良
又方以繩度所住戶中壁屈繩則斷之

又方桃木蠹屎末之水服方寸匕

又方木豉等分酒漬服之妙

又方正旦吞麻子赤小豆各三七枚又以二七枚投井中

又方新布袋盛大豆一升內井中一宿出服七枚

又方松葉末之酒服方寸匕日三

又方常以七月七日合家向日吞赤小豆二七枚

又方常以七月七日男吞大豆七枚女吞小豆二七枚

又方正旦取東行桑根大如指長七寸以丹塗之挂門戶上又令帶之

又方常以月望日細剉東引竹枝煮湯浴

瘴氣。蒜五子并皮碎之。破心一升。以三歲男兒尿二升。煮五六沸去滓服之。良。

又方。青竹茹三升。以水四升。煮取三升分三服。汗不止者。白朮葉作飲。方寸日飲□

盜汗。韭根四十九枚。水二升。煮一升。頓服。

又方。豉一升。以酒二升漬三日。若服不差。更合服不過三劑。

消渴。甘草乾薑各二兩。㕮咀。水三升。煮取升半去滓。分二服。又法。有大棗十二箇。

渴利。生栝萎根三十斤。切。以水一石煮取一斗半去滓。以牛脂五合煎水盡。以溫酒食。如雞子大。日三服。

渴口便利。復非淋。榆白皮二斤。切。以水一斗煮取五升。一服三合。日三。

又方。小豆蔻一把。搗取汁。頓服三升。

又方。薔薇根水煎服之佳。

又方。三年重鵲巢燒末。以飲服之。

又方。桃膠如彈丸。含之咽津。

又方。蠟如雞子大。以酢一升煮。二沸適寒溫。頓服之。

熱渴頭痛壯熱。及婦人血氣上衝。悶不堪者。茅根切三升。搗取汁。渴即飲之。令盡。消渴病百日以上者。不得灸刺。

消渴。乾浮萍、栝蔞根等分末之。以人乳汁和丸如梧子空腹飲服二十九日三。三年病者三日愈。治虛熱大佳。

治渴。黃連一斤生地黃一斤。又云十斤絞地黃取汁浸黃連出燥曝之。燥復內之。令汁盡乾之。搗末蜜丸如梧子每服二十九日三食前後無在亦可爲散。以酒服方寸匕。

大渴深掘大栝蔞根厚削皮至白處以寸切水浸一日夜易水經五日取出爛搗研之以絹袋瀝之。如出粉法乾之。水服方寸匕日三四亦可粥乳酪中食之。不限多少。取差止。又云水和栝蔞散服方寸匕亦可蜜丸如梧子大每服三十丸。

又方取七家井索近桶口結燒作灰。井花水服之。不過三服差。

又方取豉漬汁任性多少飲之。

又方濃煮竹根取汁飲之以差止。

又方以青梁米煮取汁飲之以差止。

消中日夜尿七八升者鹿角炙令焦以酒服五分匕日三漸加至方寸匕。

又方溫麻汁服一升佳。

又方葵根如五升盆大兩束。又云五六斤以水五斗煮取三斗宿不食平旦每服三升。

諸淋細白沙三升熬令極熱以酒三升淋取汁服一合

淋痛蒲黃滑石等分末之酒服方寸匕日三

氣淋船底胎如鴨子大水三升煮取二升頓服

又方水三升煮豉一升一沸去滓內鹽一合頓服亦可單煮豉汁服

又方水一斗煮比輪錢三百文取三升溫服之

又方搗葵子末湯服方寸匕

又方空心單茹蜀葵一滿口止

又方熬鹽熱熨小腹冷復易亦治小便血

又方臍中着鹽灸三壯

石淋車前子二升絹袋盛水九升煮取三升頓服之石即出先經宿不得食

又方取浮石使滿一手治下篩以水三升酢一升煮取二升澄清服一升不過三服石出亦治嗽醇酒煮

之又方桃膠棗許大夏以三合冷水冬以三合湯和一服日三當下石子如豆卵石盡止亦治小便出血

又方灸水泉三十壯足大敦是也

膏淋。搗葎草汁二升。酢二合。空心頓服之。當尿小豆汁也。又濃煮汁飲亦治淋瀝。

熱淋。葵根一升。冬用子。夏用苗。切大棗二七箇。以水三升。煮取一升二合。分二服。熱加黃芩一兩。出難。加

滑石末二兩。血者加茜根三兩。痛者加芍藥二兩。加藥水亦如之。

又方。白茆根切四斤。以水一斗五升煮取五升。服一升。日三夜二。

又方。常煮冬葵根飲之。

血淋。生大麻根十箇。以水五升煮取二升。頓服之。亦治小便出血。

又方。大豆葉一把。水四升。煮二升。頓服之。

又方。葵子一升。水三升。煮取汁。日三服。亦治虛勞尿血。

又方。灸丹田。隨年壯。又灸伏留五十壯。又云隨年壯。

五淋。灸懸泉十四壯。穴在內踝前一寸。斜行脈上。是巾封之別名。

又方。灸大敦三十壯。

卒淋。灸外踝尖七壯。

小便血。胡麻三升。搗細末。以東流水二升。漬一宿。平旦絞去滓。煮兩沸。頓服之。

小便出血。龍骨細末之。溫水服方寸匕。日五六服。一云酒服。

又方.搗荆葉取汁.酒服二合.

又方.酒三升.煮蜀當歸四兩.取一升.頓服.

又方.煮車前根葉子.多飲之.佳.

又方.刮滑石末.水和傅.繞小腹.仍繞陰際.佳.又治小便不通.

又方.酒服亂髮灰.一云水服.

又方.酒服葵莖灰方寸匕.日三.

頭面手足癰瘡漏第十六

凡口吻瘡.以經年葵根欲爛者.燒作灰.熱傅之.佳.

燕吻瘡.白楊枯枝.鐵上燒.取滿.及熱傅之.佳.

唇上瘡.經年不差.八月藍.取汁.洗三日.差.

諸瘡因風致腫.燒白芋灰.溫湯調之.傅上.厚三分.乾卽易.不過五度.差.

又方.櫟根皮三十斤.剉水三斛.煮令熱.下鹽一把.令的的然熱.以浸瘡.當出濃血.日日爲之.差止.
反花瘡.并積年諸瘡.取牛蒡根.一云牛蒡根熟搗.和臘月豬脂封上.差止.
又方.馬齒菜搗封.差止.

惡露瘡。搗薤菜傅瘡口。以大艾炷灸藥上。令熱氣入內即差。

惡瘡燒扁竹灰。和楮白汁塗之。

又方。羊屎、麻根燒煙斷膏和封。有汁乾傅。

惡瘡似火爛。白馬屎暴乾。以河水調。煮十沸。絞取汁。洗之。

身瘡頭瘡。菖蒲末傅上。日三夜二。

惡瘡十年不差。似癩蛇脫皮一枚。燒末之。猪脂調傅。醋調亦得。

又方。苦瓠一枚。咬咀。煮取汁。洗瘡口。日三。又煎以塗癩甚良。皆先以泔洗。三日差。

又方。鹽湯洗。搗地黃葉貼之。

又方。燒獾猪屎傅之。

又方。燒蕷菪子末傅之。

諸瘡久不差。并六畜瘡。聚膏三升。水三斗。煮取一斗半。數洗。取愈。

代指。甘草二兩。咬咀。水五升。煮取一升半。漬之。若無用芒硝代之。

又方。以唾調白礀砂。搜麪作碗子盛唾。着礀砂如棗大。以爪指着中。一日差。

又方。以毛雜黃土作泥。泥指上。令厚五分。內糖灰中煨。令熱可忍。泥乾易數度差。

又方刺指熱飯中二七偏愈。

又方以麻沸湯漬之卽愈。

又方單煮地榆湯漬之半日差。

又方先刮去膿血炙魚鮮皮令溫以纏裹周匝痛止便愈。

又方蜀椒四合水一升煮三沸以漬之。

又方取萎黃蘆菜煮湯漬之。

指痛欲脫猪脂和鹽煮令消熱內其中食久住千金翼作和乾薑。

手足指掣痛醬清和蜜溫塗之。

又方灸指端七壯。

手足指逆臚此緣廁上搔頭還坐廁上以指倒捋二七下卽差。

凍指馬屎三升以水煮令沸漬半日愈。

人腳冬夏常拆裂雞屎一升水二升煮數沸停小冷漬半日差亦用馬糞。

又方羊膠膠乾故帛貼上。

九漏成鍊松脂末之填瘡孔令滿日三四度七日差。

又方馬齒莧陰乾臘月燭燼等分末之以臘月豬脂調先以暖泔清洗瘡拭乾傅之日三
又方乾牛屎乾人屎搗先幕縣于瘡上縣上着屎蟲聞屎香出若癢卽舉縣去之更取縣着屎如前蟲出
盡乃至

又方苦瓠四枚大如盞者各穿一孔如指大置湯中煮十數沸取一竹筒長一尺內一頭瓠孔中一頭注
瘡孔上冷則易之偏止

又方煮鹽花以麪擁病上內鹽花麪匡中厚二寸其下以桑葉三重藉鹽候冷熱得所可忍冷則無益熱
則肉破一日一度候病根勢消則止若已瘡者搗穄穀末粉之

又方槲北陰白皮三十斤剉之以水一石煮取一斗去滓煎如糖又取都廁上雌雄鼠糞各十四枚燒令
汁盡末內煎中溫酒一升投煎中合攪之羸人五合服之當有蟲出

漏作瘡孔末露蜂房臘月豬脂調傅孔上

瘡因風致腫櫟木根皮一斤濃煮入鹽一把漬之

灸瘡不差者每日于上別灸六七壯自差

灸瘡中風冷腫痛但向火灸之瘡得熱則瘡快至痛止日六七灸愈

諸漏霜下瓠花暴乾末傅之

又方.搗土瓜根.薄之.燥則易.不限時節.
又方.故布裹鹽如彈丸燒令赤.末酒服.

又方.服白馬屎汁一升.

又方.正月雄狐屎陰乾末之水調服.

又方.鹽麴和燒灰傅之.

又方.水研杏仁服之.

又方.猪脂一升酒五合煎沸頓服之.

漏下槐子燒末酒服方寸匕日三立差.

一切冷瘻燒人吐出蛔蟲爲末先以甘草湯洗瘻後着灰無不差者慎口味.

鼠漏瘻差復發以不經水猪脂咬咀生地黃內脂中令足相淹和煎六七沸桑灰汁洗瘻去惡汁以此膏傅日一易.

鼠漏腫核未成膿以柏葉着腫上熬鹽着葉上熨之令熱氣下卽消.

蠅蛆瘻槲葉灰先以泔清煮槲葉取汁洗拭乾以灰內瘻中.

蜂瘻瘻漸大者熬鹽熨之三宿四日不差至百日成瘻其狀大如四五寸石廣三寸中生蜂作孔乃有數

百以石硫黃隨多少然燭燒令汁出着瘡孔中須臾間見蜂數十惟蜂盡差

又方人屎蛇脫灰臘月豬膏調傳之

又方蜂窠灰臘月豬脂調傳孔中

癩癩瘻雄雞屎灰臘月豬脂調封之

蟇娘瘦牛屎灰和臘月豬脂傳之

又方蟇娘所推丸末傳之

又方乾牛屎末傳養則撥卻更厚封差止

又方熱牛屎塗之數數易應有蟇娘出

蚯蚓瘦蚯蚓屎雞屎末之用社猪下領髓和傳之

蝎瘦五六孔相通者搗茅根汁着孔中

蛇瘦蛇脫皮灰臘月豬脂和封之

鰐當瘦搗土瓜根傳至差慎口味

雀瘦取母猪屎灰和臘月豬脂傳瘻蟲出如雀形

膿瘻桃花末和猪脂封之佳

石瘻兩頭出令人寒熱搗槐子和井花水封之。

灸漏法。蓼蕘子二合。豉一升。搗令極熟作餅。如大錢厚二分許。取一枚。當瘻孔上。作大艾炷。如小指大灸餅上三炷。一易三餅九炷。隔三日復一灸之。如是頭瘻不可灸。蓼蕘氣入腦殺人。

又方。七月七日日未出時。取麻花五月五日取艾等分合搗作炷。用灸瘻上百壯。亦灸瘻。

九漏灸肩井二百壯。

又方。灸鳩尾骨下宛宛中七十壯。

又方。遶四畔灸差。

諸惡漏中冷息肉。灸足內踝上三壯。二年六壯。

瘰癧白蘆蠶治下篩服五分匕日三十日差。

又方。故鞋底替燒末五匕。和酒一升。平旦向日服之。行須臾。吐鼠三朝服。

又方。狼屎末傅之。

又方。五月五日取一切種種雜草。煮汁洗。

一切瘰癧及觸處但有肉結凝似作瘻及癰節者。以獨頭蒜截兩頭。留心大作艾炷。隨蒜大小貼瘻子上。

灸之勿令上破肉。但取熱而已。七壯一易。日日灸之。取消止。

癰癧灸兩膀裏患癰處宛宛中日一壯七日止神驗。

又方灸五里人迎各三十壯

又方灸背兩邊腋下後文上隨年壯

又方灸耳後髮際直脈上七壯

去面黣成鍊松脂爲末溫酒服三合日三服盡三升無不差。

又方白附子末酒和傅之卽落

腳氣腫已入脛至小腹脹小便澀少取烏特牛屎一升一服日二取消乃止又云羸瘦人二分尿一分牛乳合煮乳結服

口中瘡久不差入胸中並生瘡三年已上不差者濃煎薔薇根汁含之又稍稍咽之日三夜一冬用根夏用莖葉

又方角蒿灰傅之一宿知二宿差有汁吐不得咽也

癬搗刺蘆汁服之又服地黃汁佳又燒蛇脫一具酒服又服驢尿良又搗蕡菪根蜜和傅之一無根字

又方熱搗煎餅不限多少日一偏薄之良

又方醋煎艾塗之

又搗羊蹄根和乳塗之。

癰昆布二兩洗切如指大酢漬含咽汁盡愈。

又方海燕一斤又云三兩小麥麪一升以三年酢一升麪末暴乾往反酢盡搗爲散酒服方寸匕日三忌努力。

癰上氣短氣灸肺輸百壯。

癰上氣胸滿灸雲門五十壯。

肉瘤勿治治則殺人又云不得針灸。

陰癩取楊柳枝脚指大長三尺二十枚水煮令極熱以故布及氈掩腫處取熱柳枝更互柱之如此取差。浸淫瘡以煎餅乘熱揭之亦治溼癩。

又方猪牙車骨年久者椎破燒令脂出熱塗之。

又方取苦練皮或枝燒作灰傅乾者猪膏塗并治小兒禿瘡諸惡瘡。

癰瘡酢一升溫令沸以生薤一把內酢中封瘡上差止。

又方炒臘月糟薄之。

又方燒故履系末傅之。

又方燒松根取脂塗之。

燥癩瘡酢和灰塗之。又熱牛屎塗之。

癩疥瘡癩不可堪。羊蹄根淨去土。細切。熟熬。以酢和熟搗。淨洗瘡傅上。一時間。以冷水洗之。日一。又陰乾作末。癩時搔汁出。以粉之。又以生薑根搗之。

又方。灸足大指奇間二七壯。灸大指頭亦佳。

白殿。平旦以手掉取韭頭露塗之極效。

痔第十七

痔以蒲黃水服方寸匕。日三良。又取桑耳作羹。空腹飽食之。三日食佳。

痔下血及新產漏下。好礬石一兩。附子一兩。末之。白蜜丸如梧子大。酒服二丸。日三。稍加。不過數日。便斷百日服之。終身不發。一方有乾薑一兩。

五痔十年者。塗熊膽取差止。一切方皆不及此神良。

又方七月七日多採槐子熟搗取汁。內銅器中。重絲密蓋。着宅中高門上。暴之。二十日已上。煎成如鼠屎大。內穀道中。日三亦主瘻及百種瘡。

又方痔下血及新產漏下。常食萹竹葉及煮羹粥。大佳。

又方虎頭犀角末之如雞子大和不經水猪脂大如雞子塗瘡上取差。

五痔取槐根煮洗之。

又方取桃根煮洗之。

痔出膿血有蟲傍生孔竅槐白皮一擔剉內釜中煮令味極出置大盆中適寒溫坐其中如浴狀蟲悉出。

冷又易之不過二三卽差。

久冷五痔便血灸脊中百壯。

五痔便血失尿灸回氣百壯穴在脊窮骨上。

肛出女萎一升以器中燒坐上熏之卽時入。

脫肛蒲黃二兩以豬脂和傅肛上內之二三愈。

腸隨肛出者生栝蔞根取粉以豬脂爲膏溫塗隨手抑按自得縮入。

冷痢脫肛枳實一枚石上磨令滑澤鑽安柄蜜塗灸令煖熨之冷更易之取縮入止。

又方鐵精粉內上按令人卽愈。

又方生鐵三斤以水一斗煮取五升出鐵以汁洗口再。

因寒冷脫肛灸臍中隨年壯。

又灸橫骨百壯。

又方灸龜尾七壯卽後窮骨是也。

千金寶要卷之六

千金論曰上醫醫未病之病中醫醫欲病之病下醫醫已病之病思以謂知病于未病之前者此上智之所能也知病于欲病之初者此中智之所及也若夫已病而求醫則常情同然不必論其智不智也孫氏曰聖人設教欲家家自學人人自曉尊親有疾不能療之者非忠孝也斯言可謂切至矣氣不調百病自生衆病積聚皆起于虛又曰虛生百病藥石有相欺者入人腹中遂相鬪爭力甚刀劍言不知性氣者不可服也凡服食藥餌須量自己性理所宜不可見彼得力我便服之人患瘡痍未瘳不得合陰陽

婦人妊娠食羊肝令子多厄食山羊肉令子多病食驢肉延月食兔犬肉令子無音聲并缺唇食驃肉產難食雞子及乾鯉魚令子多瘡食椹并鴨子令子倒出食雀肉并豆醬令子面多黓黯黑子食雀肉飲酒令子心淫情亂不畏廉恥食鱉令子短項食冰漿絕胎多經大驚者生子患癲向非常地大小便必半產殺人穢汚死喪家人來看視產婦則難產傷兒不依產圖令子母多妨產乳若在反支月者浣濯水以器盛出此忌月方覆之產婦人衆看則難產臨產憂悒則難產兒已生不得自視穢汚便利子懸廁之上成十二癟疾產後百日內勿行房大忌上廁只室中上盆佳暑月產臥忌取涼百日忌服轉瀉藥月經不去

大忌合陰陽。生十二疾。臥濕冷地。大忌合陰陽。生十二疾。小兒初生。不以絲裹指。拭口中青泥惡血。則入腹。生百病。初生舉之遲。則中寒。臍帶隔衣咬斷之。不得以刀子截。臍帶留至足跌。短則中寒下痢。斷臍後浴者。水入臍。令兒腹痛。臍帶中多有蟲。不去之。則入腹成疾。臍留六寸。長則傷肌。短則傷臟。臍不以時截。及接汁不盡。則寒生臍風。兒生男以父。女以母故。衣裹之過厚。皮膚害血脈。發雜瘡而黃。新生兒衣暖大厚。令筋骨緩弱。解脫兒臍。及換衣。如冬月須閉戶。生三日。朱蜜食多。則脾胃冷。腹脹喜陰。氣急變噤。而乖。臍帶瘡未愈。數洗浴。令兒患陰頬。兒太飽則吐。及風中臍。夏不去熱乳。令兒嘔逆。冬不去寒乳。令兒欬痢。母新房以乳兒。令兒羸瘦。交脛不能行。母有熱。以乳兒。令變黃。不能食。母怒以乳兒。令喜驚。發氣痛。又令上氣顛狂。母新吐下以乳兒。令兒虛羸。母醉以乳兒。令兒身熱。腹滿。乳兒當極接散其熱氣。勿令奔出。乳兒不得用宿乳。母欲寐。則不得乳兒。恐失飢飽。及填兒口鼻也。浴兒水不冷熱得所。則令兒驚。亦致五臟病。(兒冬不可)兒冬不可久浴。久浴則傷寒。夏不可久浴。久浴則傷熱。數浴背冷則發癧。小兒不浴。又令兒毛落。衣暖至汗出。卻外風入腹爲病。因驚怖大啼。多爲病因。先不哺乳。吐而變熱者。爲癧。新生無病懼。不可逆針灸。衣甚薄。則乳食不消。大便醋臭。此欲爲癧也。乳哺食節作疾。新生一歲兒。外人來氣息忤之。則爲客忤病。雖是家人。或別房異戶。從外還者。不避之。爲客忤。雖是乳母。及父母從外來。亦能令兒爲客忤。一應親戚。及外來人。有衣服。經履鬼神。蘿惡暴氣。或牛馬之。

氣并能令兒爲客忤。一應人執作喘息及乳母乳氣未定者，并能爲客忤。乳母遇醉及房勞，喘後乳兒最劇，能殺兒。凡諸乘馬行，得馬汗氣息未盥洗，易衣裝而便向兒邊者，令兒中馬客忤。一歲兒勿見馬來，及聞馬鳴驚，能令兒作客忤。兒衣布帛綵中及履中，不得有頭髮。白衣不得用青帶，青衣不得用白帶，皆能爲客忤。凡非常人及諸物從外來，亦驚小兒致病，欲防之法，當將兒避之。若不避者，當燒牛屎，令常有煙氣，置戶前則善。秋初夏末，晨夕暴冷，不避之，多患肚熱下痢。小兒解着傷風，亦作傷寒病，尋常晚夜及陰雨夜，小兒衣物不得在露地，有釣星鬼禽喜落毛羽于人中庭，置兒衣中，便令兒作癟病，必死。七八月尤忌，兒生未能行，而母再有娠，使兒飲此乳，作魃病。小兒飲食過度，不知自止，作疾。小兒夏月積冷，洗浴過度，及乳母亦將冷水洗浴，以冷乳飲兒，兒壯熱，忽值暴雨涼，即令兒病痢等。夏月暴寒，小兒不避之，入胃則暴病，中客忤，心腸脹滿，刺痛，口噤，氣急，停屍卒死者，服張仲景備急丸。

人失明之本，有十六件事。生食五辛，接熱飲食，熱食麪食，飲食不已，房室無節，極目遠視，數看日月，夜視星火，夜讀細書，月下看書，抄寫多年，雕鏤細作，博奕不休，久處煙火，泣淚過多，刺頭出血過多，又由馳騁田獵，冒涉風霜，迎風追獸，日夜不息之所致也。

地因寒暑風溼，皆作蒸氣，人足履之，謂之風毒，名爲腳氣。婦人產後，尤宜慎此。四時之中，不得久立久坐，溼冷之地，令人作腳氣病。酒醉汗出，脫衣靴襪，當風取涼，皆成腳氣。患腳氣人，忌大怒，忌房室，忌牛羊肉。

蒜。蕺菜。菘菜。蔓菁。瓠子。酒麯。酥油。乳糜。猪雞。鵝鴨。不得犯之一方。用鯉魚。外魚亦忌。又忌生果酸酢之食。宜食生牛乳。與生栗子。及粳梁粟米。醬豉。葵花。薤。薤。橘皮。

病有三患。一患覺之晚。二患驕狠恣傲。三患狐疑不決。犯之多枉傷性命。故曰法爲信者施。不爲疑者設。欲臨近亡人。宜將少金牙散塗鼻孔耳門。及祝疾者亦然。亦宜帶絳囊一方寸匕。男左女右。

新食畢取風者。令人患胃風。因醉取風者。令人患漏風。新沐浴畢取風者。令人首風。新房室畢取風者。令人患內風。尊貴人骨弱肌膚盛。因疲勞汗出。偃臥不時動搖。被微風所及。得血瘻疾。凡常之日。忽然暴熱。頓取涼快意。生病亦然。暴寒亦然。

冬時嚴寒最宜周密。若觸冒之者爲傷寒。四時之氣皆能爲病。其傷寒尤重。以其殺厲之氣故也。辛苦之人。春多患溫病。以冬時多觸冒寒冷所致。時行之氣。犯之多病。所謂時行之氣者。春時應暖而反大寒。夏時應熱而反大冷。秋時應涼而反大熱。冬時應寒而反大溫。凡熱病。大病。新差之後。食豬肉。及羊血。肥魚油膩等物。必大下痢。醫所不能治。食餅餌。粢黍。飴。餑。炙。棗栗諸果物。肺脩及堅實難消之物。胃氣尚虛弱。不能消化。必更結熱。下之則大痢難禁。不下之必死。下之復危。皆難治也。不可不慎。但得食糜粥。寧少食。令飢勿飽。不得他有所食。引日轉久。可漸食。羊肉。白糜。若羹汁。雉兔鹿肉。不可食。猪狗肉。當靜臥。勿早起。梳頭洗面。非但不可體勞。雖言語亦不得多。亦不得生心。用意煩勞。凡上氣事。並令人勞復。女勞當舌。

吐數寸而死。凡差未滿百日，氣力未平復，而以房室者，略無不死。未滿五日，食一切肉麪，病更發大困食生魚鮓，下痢必不止。食生菜，令人顏色終身不平復。病新汗解，飲冷水者，損心胞，令人虛補不復。食生聚及羊內者，必膈上作熱蒸，食犬羊等肉者，骨中蒸熱，食魚肉與瓜生菜，令人身熱，食鱠者，病發必大困，早起勞多，及美飲食過多，致發欲死。

穀疽者，由失飢大食，胃氣衝熏所致。酒疽者，由大醉當風，入水所致。女勞疽者，由大勞大熱，而交接畢入水所致。黃疽，有人以竹筒使人極吹，病人鼻中者，無不死。大慎之。

夏傷暑，至秋作瘡瘍。冬中于風，寒氣藏于骨髓中，至暑有所用力，腠理開，又中邪氣，能作瘡。肺有熱，因有所作用力，腠理開，能令作瘡。

交接損，令人卵縮筋攣。

食生物，令蟲卵生入腹者，成蟲蛇及魚鼈，勞倦或飲食過常，作吐血。

服藥吐利後，常須閉口少語，于無風處，溫牀暖食將息。

凡人執作汗出當風，因以房室過度，醉飲飽滿行事，令心氣逼迫，短氣脈悸，得風癲病。
熱沐髮而濕結之，腦汗未止，得濕癲病。

因大驚，及當風從高墜下，致喜悲，善恐怖，如有鬼物患。

有所擊仆。若醉飽入房。汗出當風。則必傷脾。

凡患痢。服止藥初間。痢須轉劇。愚人不能便。不服其藥。此誤也。但服不過。再三服之。痢病通。忌生冷。醉滑猪雞魚油乳酪酥乾。肺醬粉鹽所食諸食。皆須大熟爛爲佳。亦不得傷飽。

凡瘧。鹽醬酢酥油棗皆忌。惟白飯。豉。苜蓿苦苣蕪菁。不在禁限。

凡日月蝕時。忌食飲。腹中生蠶蟲。及房室。生子不具足。必患月蝕瘡。日月蝕不得與兒乳。日月生後。乃不忌。令人口臭。齒斷宣露。常有血出。舌上生瘡。

飲酒當風入肺。膽氣妄泄。卽令人目青氣喘。酒客勞倦當風。喜怒氣含于肺。面目黃腫。卽頭眩。欬逆上氣。時忽欲絕。心下弦急。不能飲食。或吐膿血。胸痛引背。支滿欲嘔。

七氣者。寒氣熱氣。怒氣恚氣。喜氣憂氣。愁氣。此七種氣積聚堅大如杯。若拌在心腹中。疾痛不能飲食。時來時去。每發欲死。如有禍祟。

尸疰鬼疰者。卽五尸之中尸疰也。又挾諸鬼邪爲害者也。其大略。令人寒熱淋瀝。沉沉嘿嘿。不的知其所苦。而無處不惡。累年積月。漸就頓滯。以至于死。死後復注易傍人。乃至滅門。覺如此候。宜急療之。人有九蟲。其蟲凶惡。人之極患也。常以白筵草沐浴。佳根葉皆可用。既是香草。又尸蟲所惡也。凡服補藥。及治諸病。皆須先去諸蟲。并淡飲宿癖。醒解除盡。不爾。必不得藥力。脾勞熱。有蟲在脾中。令人好嘔。肺勞。

熱生蟲在肺。腎勞熱。四肢腫急。有蟲曰蟻蟲。如菜中蟲。在腎人得傷寒。及天行熱病。腹中有熱。及人食少。腸胃空虛。若齒斷無色。舌上盡白。甚者唇裏有瘡。四肢沉重。忽忽喜眠。當數看其上唇內有瘡。唾血。唇內如粟瘡者。心內懊惱。痛悶者。此有三蟲在上。蝕其五臟。下唇內生瘡者。其人喜眠。此蟲在下。蝕其下部。人不能知。可服蝕蟲藥。不爾。蠶蟲殺人。熱病帖毒。令人喜寐。不知痛處。而面赤如醉。下利膿血。當數視其人下部大小之孔。稷稷然亦則是蠶蟲也。劇能殺人。

若有所用力舉重。若入房過度。汗出如浴水。則傷腎人。因身勞汗出。衣裏冷濕。久而得腎著之病。身體重。腰以下如帶五千錢。腰中冷如冰。又其人本來不吃。忽然塞吃而好嗔恚。反常性。此腎之傷也。取寒眠地。臥冷濕地。氣所傷。則腰痛墜墮。傷腰。則腰痛。肝傷善夢。心傷善忘。脾傷善飲。肺傷善萎。腎傷善睡。骨傷善飢。肺傷善嗽。遠思強慮。傷人憂恚悲哀。傷人喜樂過度。傷人忿怒不解。傷人汲汲所願。傷人戚戚所患。傷人寒暄失所。傷人。

五勞七傷。有小腹急痛。膀胱虛滿。手足逆冷。食飲苦吐酸痰。嘔逆泄下。少氣。目眩耳聾。口焦。小便自利者。虛損。少氣。腹脹內急。拘引小腹。至冷不得屈伸。不能飲食。寒熱頭痛。手足逆冷。大小便難。或復下痢。口乾。夢中泄精。或時吐逆。恍惚。面色枯瘁。又復微腫。百節酸疼者。五勞七傷。虛羸不足。面色黎黑。手足疼痛。久立腰疼。起則目眩。腹中懸急。而口絕傷。外引四肢者。

虛勞寒口飲在脇下決決有聲飲已如從一邊下決決然也。有頭並衝皮起引兩乳內痛裏急善夢失精氣短目疏忽忽多忘者。

五勞七傷小腹急臍下膨亨兩脇脹滿腰脊相引鼻口乾燥目暗疏忽憒憒不樂胸中氣急逆不下飲食。莖中策痛小便黃赤尿有餘瀝夢與鬼神交通去精驚恐虛乏者。

凡男女有因積勞損或大病後不復常苦四體沉滯骨肉酸疼吸少氣行動喘懶或小腹拘急腰背強痛心中虛悸咽乾唇燥面體少色或飲食無味陰陽廢弱悲憂慘戚多臥少起者。

有大勞虛劣寒熱嘔逆下焦虛熱小便赤痛客熱上熏頭痛目疼骨肉痛口乾者。

有虛勞不足四肢煩疼不欲食食則脹汗出者。

有虛勞少氣胸心淡冷時時驚惕心中悸動手脚逆冷體常自汗腸鳴風濕者。

有虛勞損羸乏欬逆短氣四肢煩疼腰背引痛耳鳴面黎黑骨間熱小便赤黃心悸目眩者。

有大虛不足小便數噓吸焦矯引飲膀胱滿急者。

有左脇氣衝膈上滿頭上有風如蟲行手足頑痺鼻塞脚轉筋兩日時腫痛者。有虛損短氣咽喉凝唾不出如膠塞咽喉者。

有五勞六絕其心傷者令人善驚妄怒無常者。

有五勞六絕其脾傷者令人腹滿喜噫食竟欲臥面目痿黃者

有五勞六絕其肺傷者令人少精腰骨痛四肢厥逆者

有五勞六絕其肝傷者令人少血面黑者

有五勞六絕其腎傷者有積聚少腹腰背滿痺欬唾小便難者

六絕之爲病皆起于大勞脈虛外受風邪內受寒熱令人手足疼痛膝以下冷者

有五勞六絕腹中雷鳴時時泄痢者

有五勞六絕或閉或痢面目腫心下憤憤不欲語憎聞人聲者

有五勞七傷八風十二痺無有冬夏悲憂憔悴者凡是病皆須服之者

有虛勞百損者

有五勞六極七傷虛損者

男子女人虛損傷絕頭目眩骨節煩痛飲食微少羸瘦百病者

有虛勞腎氣不足腰痛陰寒小便數囊冷濕尿有餘瀝精自出陰痿不起忽忽悲喜者

有五勞七傷六極強力行事舉重重病後骨髓未滿而行房室所食不消胃氣不平者

有五勞七傷每事不如意者

有陰下濕癢。汗出或生瘡。莖中痛者。

有濁血者。

有膀胱冷。欬唾有血。喉鳴喘息者。

有膀胱腎冷。坐起欲倒。目睂睂。氣不足。骨痿者。

有膀胱寒。小便數。漏精稠厚如白米泔者。

有胞屈僻。津液不通者。

有尿白濁者。

有胞轉者。

有上焦熱。腹滿而不欲飲食。或食先吐而後下。肘攣痛者。

有上焦飲食下胃。汗出面背身中皆發熱者。

有上焦冷下痢。腹內不安。食好注下者。

有上焦閉塞。乾嘔而不出。熱少冷多。好吐白沫。青涎吞酸者。

有中焦實熱閉塞。上下不通。隔絕關格。不吐不下。腹滿澎澎喘急者。

有中焦熱水穀下痢者。

有中焦寒，洞泄下痢，或因霍亂後，瀉黃白無度，腹中虛痛者。

有下焦熱，大小便不通者。

有下焦熱，或下痢濶血，煩悶恍惚者。

有下焦熱毒痢，魚腦雜痢，赤白，臍下小腹絞痛，不可忍，欲痢不出者。

有膀胱三焦津液不下，大小腸中寒熱，赤白泄痢，及腰脊痛，小便不利，及婦人帶下者。有下焦虛寒，津液不止，短氣欲絕者。

有下焦虛寒損，或見血後便轉，此爲亡血，或利或不利。

有下焦虛寒損，或先便轉，後見血，此爲遠血，或利或不利，好因勞冷而發者。

有三焦虛損，或上下發泄吐唾血，皆從三焦起，或熱損發，或因酒發者。

有手足厥冷脈絕者。

有下焦虛寒損，腹中瘀血，令人喜恚，不欲聞人語，胸中噎塞而短氣者。

有吐下汗出，而小便復利，或下利清穀，裏外熱脈微，欲絕，或發熱惡寒者。

凡霍亂，務在溫和將息，若冷則遍體轉筋，此病定一日不食爲佳，仍須三日，少少喫粥，三日已後，可依常食息，七日勿雜食爲佳，所以養脾氣也。

有霍亂吐下脹滿食不消心腹痛者。

有霍亂吐利止而身體痛不休者。

有霍亂轉筋血冷汗出嘔喎者。

有霍亂吐利已斷汗出而厥四肢拘急不解脈微欲絕者。

有霍亂已服理中四順熱不解者。

有婦人霍亂嘔逆吐涎沫者慎不可下。

有年老霍亂羸劣冷柔惡心食飲不化心脹虛滿拘急短氣嘔逆四肢厥冷心煩氣悶而須汗者。

有毒冷霍亂吐利煩嘔轉筋肉冷汗出手足指腫喘息睡死絕語音不出者。

有霍亂蟲宿食不消積冷心腹煩滿鬼氣者。

有霍亂洞下不止者。

有霍亂引飲飲輒乾嘔者。

有先服石人因霍亂吐下服諸熱藥吐不得止因卽變虛心煩手足熱口乾燥欲得水嘔逆迷悶脈急數者。

有時行熱病後毒未盡因霍亂吐下仍發熱心胸欲裂者。

有霍亂皆因飲食非關鬼神。因飽食肫膾復漿乳酪。海陸百品無所不噉。眠臥冷席多飲寒漿。胃中諸食結而不消所致。思謂此說止爲貴者言。若貧下此症亦以瓜李生冷不慎致然。

霍亂人忌與米飲。胃中得米即吐不止。但與厚朴葛根飲。若多瓜葉飲。但沾瀆咽喉而不可多與。若服湯時隨服吐者。俟吐定乃止。診脈絕不通。以桂合葛根爲吐下心煩肉熱。汗不出。不轉筋。脈急數者。可犀角合葛根爲飲。吐下不止。發熱心煩。欲飲水可少飲米粉汁爲佳。若不止。可與葛根薑危飲服之。

婦人霍亂嘔吐者。

霍亂四逆。吐少嘔多者。

霍亂久將遠行預備者。

霍亂永不發丸者。

中熱霍亂。暴利心煩。脈數欲得冷水者。

陰陽二氣擁而反戾。陽氣欲升。陰氣欲降。陰陽乖隔。變成吐利。頭痛如破。百節如解。遍體諸筋皆爲回轉。論症雖小。卒病之中最爲可畏。雖臨深履危。不足以喻之。

人生放恣者衆。盛壯之時不自慎。惜快情縱慾。極意房中。稍至年長。腎氣虛竭。百病滋生。時服石散。真氣既盡。石氣孤立。惟有虛耗。唇口乾焦。精液自洩。或小便赤黃。大便乾實。所食之物皆化作小便。此皆由房

室不節之所致也。

熱結中焦則爲堅。

下焦熱則爲溺血。令人淋閉不通。

氣淋之爲病。溺難澀。常有餘瀝。

石淋之爲病。症中痛。溺不得出。

膏淋之爲病。尿似膏自出。

勞淋之爲病。勞倦即發。痛引氣衝下。

熱淋之爲病。熱即發。甚則尿血。

下焦結熱。小便赤黃不利。數起出少。痙痛或血出。溫病後餘熱。及霍亂後當風。取熱過度。飲酒房勞。及行步冒熱冷飲。逐熱。熱結下焦作淋。及散石熱動關格。小腹堅。胞脹如斗。諸有此淋。悉治之立驗。

錄忌如左

喪孝。

產乳。

音樂。

一切魚。

一切肉。

蒜。

生冷。

。

房屋。

醉滑。

生冷。

蒜。

一切肉。

。

。

精食。

米豆。

油腻。

。

。

。

。

。

看並忌不得食及不得用心其不禁者並具本方之下再發若不爾若雖差復發復發不可治婦人產後飲水不卽消三焦決漏小便不利仍相結漸漸生聚遂流諸經絡故也

忌腹上出水出水者一月死大忌之

第一層黑傷肝

第二缺盆平傷心

第三脾出傷脾

第四背平傷肺

第五足下平滿傷腎熱結爲淋者

人氣急積久不差成水病者

有患水腫細腹堅如石小勞苦足脛腫小飲食便氣急此終身疾不差服丹參亦可愈

酒客有虛熱當風飲冷水腹腫陰復脹滿者

水病有通身洪腫者流腫者百藥治不差而欲死者有大腫眼合不欲開短氣欲絕者

男子女人新久腫得暴風入腹者

婦人新產上廁風入臟腹中如馬鞭者噓吸短氣欬嗽者

老婆萬病丸

牛黃、麝香、犀角一方云一錢、桑白皮、茯苓、乾薑、桂心、當歸、芎藭、芍藥、甘遂、黃芩、蜀椒、細辛、桔梗、巴豆、前胡、紫菀、蒲黃、葶苈、防風各一錢、蜈蚣、石蠍。

人參

一寸

朱砂、雄黃、黃連、大戟、芫花、禹餘糧、芫青

七枚

大戟、

朱砂、

雄黃、

黃連、

大戟、

芫花、

禹餘糧、

芫青

七枚

右三十一味並令精細牛黃麝香犀角朱砂雄黃禹餘糧巴豆別研餘者合搗重絹下篩以白蜜和更搗三千杵密封下破除日平旦空腹酒服三丸如梧子大取微下三升惡水爲良若卒暴病不拘平旦早晚皆可服但以吐利爲度若不吐利更加一丸或至三丸五丸須吐利爲度不得限丸數病強藥少卽不吐利更非他故若其發遲以熱飲汁投之若吐利不止卽以醋飯三兩口止之服藥忌陳臭生冷醋滑粘食大蒜豬雞魚狗牛馬驢肉白酒行房七日外始得一日服二日補之得食新米韭骨汁作羹粥臘食之三四頓大良亦不得全飽產婦勿服吐利以後常須閉口少語于無風處溫牀暖室將息若旅行卒暴無飲以小水送之爲佳若一歲以下小兒有疾者令乳母服兩小豆亦以吐利爲度近病及卒病皆用多積久疾病卽少服常取微溏利爲度崔氏無黃芩桑白皮桔梗防風爲二十七味

萬病丸治症開錄如左
卒病欲死

蠱毒吐血腹痛如刺。

卒中惡口噤

五疰鬼刺客忤

猫鬼□□□

瘧病未發前一日

諸有痰飲

患冷癬

宿食不消

癥瘕積聚

拘急心腹脹滿心痛。

上氣喘逆胸滿不得臥。

傷寒時行

大痢

疳濕

水病

頭痛惡寒

小便不通

大便不通

耳聾聵耳

鼻衄

癰腫

疔腫

犯疔腫血出

胸背腰脇腫

癰瘡用萬病丸傅之。

瘻瘡

冷瘡積年不差者。

瘻瘡

癬瘡

惡刺

蝮蛇蟹

蝎蟹

蜂蟻

婦人諸疾胎衣不下。

小兒客忤

小兒驚癇

小兒乳不消心腹脹滿。

仙人玉壺丸

雄黃 藜蘆 丹砂 磬石一作
礮石

巴豆 八角附子各二兩

右六味先搗巴豆三千杵次內磬石又搗三千杵次內藜蘆三千杵次內附子三千杵次內雄黃三千杵次內丹砂三千杵內蜜又搗萬杵若不用丹砂內珍珠四兩無在每內藥輒治五百杵內少蜜恐藥飛揚治藥用王相吉日良時童子齋戒爲良天晴明日無雲霧白晝藥成封密器中勿泄氣着清潔處大人服

丸如小豆。欲下病者宿勿食。平旦服二丸。不知者以粥飲發之。令下。下不止。飲冷水以止之。病在膈上。吐膈下利。或但噫氣卽已。若欲漸除。及將服消病者。如麻子大三丸。卒中惡欲死。不知人。以酒若湯和二丸。強開口灌喉中。鬼疰病百種不可名。漿水服二丸。日再。

玉壺丸治症。開錄如左。

男女與鬼交通。歌哭無常。

腹中若有蟲欲鑽脇出狀。急痛一止一作。

憂恚氣結在胸心。若連噫及欬。胸中刺痛。

心腹切痛。及心中熱。

癰飲。痰飲。

諸瘤

卒上氣。氣但出不入。并逆氣衝喉。胃中暴積聚。

癥結堅痞。

積寒熱痞。

食肉不消。腹堅脹。

腹中三蟲

下痢重者

卒關格不得大小便欲死。

瘧已發未發。

卒霍亂心腹痛煩滿吐下手足逆冷并寒熱往來。

傷寒救溼時氣熱病。

淋瀝疲瘦百節酸疼。

頭卒風腫

癰疽瘻瘍癰及欲作瘻。

鼠瘻

中水毒

齒痛

耳聾膿血汁出及卒聾。

風目赤或瘡視物漠漠淚出爛。

中蠱毒吐血腹內如刺。

中蛇蝮諸毒。

獵犬所咬。

狂馬所咋。

婦人產後餘疾及月水不通往來不時。

婦人胸中苦滯氣氣息不利小腹堅急繞臍絞痛。

小兒百病驚癇痞塞及有熱。

小兒大腹及中熱惡毒食物不化結成積聚。

小兒寒熱頭痛呼熱及吐噃。

小兒羸瘦丁笑不能食食不化。

欲問人孝省人病先服之及繫頭上。

頭上繫玉壺丸辟百鬼。

獨宿山澤冢墓廟社叢林之中燒一丸百鬼走去以蠟和一丸如彈丸着絳囊繫臂男左女右山精鬼魅皆畏之。

千金須知

中慢驚爲陰癇。

緩縱爲痙。

淋爲癃。

黃爲瘡。

強直爲痓。

喘嗽爲欬逆。

隔氣爲膏盲。

熱死爲渴。

怔忡爲悸。

利爲滯下。

臟毒爲痢之蟲毒。

腸風爲腸滯下血。

嘔逆爲噦逆。

服金石藥爲服石。

度者量也。

漬者浸也。

和者調也。

傅者塗也。

暴者曬也。

咬咀者秤畢細切也。

三兩者今之一兩。

三升者今之一升。

方寸匕者正方一寸散子以不落爲度。

錢匕者五銖銅錢上全抄也。

錢五匕者今五銖錢邊五字者以抄之令不落爲度。

半錢匕者一錢抄取一邊。

梧桐子大者以二大豆準之。

刀圭者如梧桐子大。

一撮者四刀圭。

如彈丸如雞子者十梧桐子準之。

一升者取平升爲正。

一把者二兩。

草一束者三兩。

桂尺者削去皮半兩。

甘草一尺者二兩。

蜜一斤者有七合。

豬膏一斤者二升二合。

半夏一升者洗畢五兩。

椒一升者三兩。

吳茱萸一升者五兩。

菟絲子一升者九兩。

蕪蕓子一升者四兩。

蛇牀子一升者三兩半。

地膚子一升者四兩。

巴豆以枚計者去皮心二分準豆六枚。

附子烏頭以枚計者去皮半兩準二枚。
枳實以枚計者去穰二分準二枚。

棗三枚準一兩。

生薑一累半兩。

此書初得華州石刻，舛謬最多。繼得華州木刻及蜀中及郭武定木刻，其謬猶華之石刻也。其門類錯亂者，茲皆類明。拾遺一段，茲皆附之各類。小兒兩類併而爲一，爲其便于檢閱也。其間有字句之謬，可以意會者，乃敢更之。中有文字高古不能讀者，不敢輒易，乃仍舊焉。自千金論起，至若有所舉重段止，似欲人知所避忌也。自五勞七傷有小腹急痛起，至婦人新產上廁段止，既無治法，又無令人避忌之意。自五勞段數至第二十二段，中有凡是病者，皆須服之之句。後淋閉論末，又云悉服之立驗，或亦萬病玉壺各有所主也。因併及之。

委官李海立

生員謝沾書

穀祿鄒鳳臯刻

中華民國二十六年六月初版

* E 九三五

張

編集者

孫

思邈

發行人

王

雲五

印刷所

商務

印書館

發行所

上

海及各埠

商務

印書館

上海河南南路

編主五雲王

叢書集成初編

千金寶要

